

8935

ԿԵՆՍԱԳՐԱԿԱՆ ՆՈԹԵՐ

ԱՐԺ. Տ. ՀՄԱՅԵԱԿ ԽԱԶԱԿԻՐ
Ա. ՔՀՆՅ. ԷՔՍԷՐՃԵԱՆԻ ԿԵԱՆՔԷՆ

ԻՐ ՔՀՆՅ. ՁԵՌՆԱԴՐՈՒԹԵԱՆ
ՔԱՌԱՍՈՒՆ ԵՒ ԵՐԵՔ ԱՄԵՍԿԻՆ ԱՌԹԻՒ

Կազմեց
ՀՄԱՅԵԱԿ Ծ. ՎՐԴ. ՊԱԽԹԻՍԵՐԵԱՆ

Տպագրութիւն
Յ Ա Կ Ո Ւ Ա Բ Ր Ա Հ Ա Մ Ե Ա Ն
Անգարա ճասէտի, Բեչիս ԷՃ. Խան, քիւ 12
Կ. ՊՈՒԼԻՍ
1935

281.64

* 4 - 41

Համայնքի Միավորված Գրասրահային կենտրոն
Ձեռագրեր 23-Տ-972 Գրասրահային կենտրոն
NOV 2009

ԿԵՆՍԱԳՐԱԿԱՆ ՆՈԹԵՐ

281.69

Կ-41

ԱՐԺ. Տ. ՀՄԱՅԵԱԿ ԽԱԶԱԿԻՐ
Ա. ՔՀՆՅ. ԷՔՍԷՐՃԵԱՆԻ ԿԵԱՆՔԷՆ

ՀՐԱՏԱՐԱԿՈՒԹԻՒՆ ՅՈՒՐԵԼԻՆԱԿԱՆ ՅԱՆՁՆԱԺՈՂՈՎՈՅ

ԻՐ ՔՀՆՅ. ՋԵՌԵՆԱԳՐՈՒԹԵԱՆ
ՔԱՌԱՍՈՒՆ ԵՒ ԵՐԵՔ ԱՄԵԱԿԻՆ ԱՌԹԻԻ

Կազմեց

ՀՄԱՅԵԱԿ Ծ. ՎՐԻ. ՊԱԿԻԹԵԱՐԵԱՆ

Տպագրութիւն

ՅԱԿՈՒ ԱՐԻԱ ՀԱՄԵԱՆ

Անգարա շահեհի, Ռեհիս ԵՃ. Խամ, թիւ 12

Կ. ՊՈԼԻՍ

1935

ԱՆԴԱՄՔ ՅՈՒՆԷԼ ՅԱՆՁՆԱԺՈՂՈՎՈՅ

- Տ. Հմայեակ Ծ. Վ. Պախրիյարեան, (Ճախագահ)
- Տ. Վահրամ Ա. Քհ. Յակոբեան
- Տ. Տանաս Ա. Քհ. Փաշաեան
- Տ. Թովմա Ա. Քհ. Շիկահեր
- Տ. Արամ Քհ. Պատմանեան
- Պ. Հայկ Րեիզեան
- Պ. Զարեհ Մեգպուրեան } Սկիւսարեհ
- Պ. Արամ Թազուրեան
- Պ. Վահրամ Էմմեհեան } Գասը-գիւղեհ
- Տօք. Երանոսեան
- » Մխիթարեան } Գում-գափուեհ
- Պ. Պետրոս Ասրունի
- Պ. Մկրտիչ Իւրիեան
- Պ. Լեւոն Սուրեհեան } Բերայեհ
- Պ. Պողոս Պեգազեան
- Տօք. Ն. Թիւլեան } Պագրը-գիւղեհ
- Պ. Պերն Կիւլեաւրեան } Գուգկուցնուգեհ



3685-72

ԵՐԿՈՒ ԽՕՍՔ

Երկար դարերէ ի վեր իրաւ է թէ կուսակրօն եկեղեցականութիւնը, տիրանալով եկեղ. բարձր աստիճաններու ու հոգեւոր պաշտօններու. շնչտեր է իր գոյութիւնը եկեղ. պատմութեան ու գրականութեան մէջ եւ սակայն ուշադիր թափանցում մը նոյն պատմութեան ոսկետառ էջերուն՝ ցոյց կուտայ թէ հայ ամուսնացեալ եկեղեցականութիւնն եւս, սկսեալ Ղեւոնդեանց քահանաներէ, ոչ-նուազ կարեւոր դերեր կատարած է հայ հոգեւոր եւ ընկերական իրականութեան մէջ:

Ներկայ սերունդն իսկ մեծ յարգանքով ու երախտիքով կը յիշատակէ անունները մեզի իսկ ժամանակակից բաւական թուով պատուական քահանաներու, որոնք լուսաւոր հետքեր թողլով հեռացած են Զինուորեալ եկեղեցիի գոգէն՝ ի ծոց Յաղթական եկեղեցոյ:

Հայ ժողովուրդը, որչափ խստադատ՝ ապիկար ու անարժաններու, նոյնչափ ալ երախտաւոր ու զնահատող գտնուած է միշտ տաներէցութիւնն ու խոստովանահայրութիւնը արժեցնել զիտցող քահանայ հայրերու հանդէպ:



Գնահատելու այս գեղեցիկ գիծն է, զոր Սկիւտարի Ս. Խաչ եկեղեցոյ Պատ. Թաղ. Խորհուրդը ի յայտ բերաւ վերջերս, հանդէպ նոյն եկեղեցոյ բազմապատակ աւագերէցին, Արժ. Տ. Հմայեակ Խաչակիր Ա. Քահանայ էքսէրճեանի, որոշելով վայելուչ հանդիսութեամբ տօնելու անոր քահանայական ձեռնադրութեան քառամունեւերք ամեակը:

Թաղ. Խորհուրդի այս փափսքն ու որոշումը Պատրիարքական բարձր հանութեան ու հաւանութեան արժանացած ըլլալով, կազմուեցաւ Յոբելինական Յանձնաժողով մը մեր նախագահութեամբ, որ ներկայ տարւոյս Յուն-

ուարի եւ Փետրուարի մէջ մէկ քանի խորհրդակցութիւններ կատարելէ յետոյ, որոշեց յորելիարին կենսագրութիւնը հրատարակել պրօշիւրով մը: Սոյն աշխատութիւնն ալ վըստահուեցաւ մեզի:

Իր բովանդակ կեանքը համակ գործունէութիւն ու եռանդ մտքի ու հոգիի մշակոյթին ու լուսաւորման սահմանած, կեանքի դառնութիւնները ցմրուր քամած, պարտականութեանց պատնէշին վրայ զմայլելի կորովով մը հիւժած, հեծած այլ անընկրկելի մնացած եկեղեցականի մը համար, որպիսին է էքսէրճեան քահանայ, երախտիքի արիտուր մ'է, զոր իր հովուած եկեղեցւոյն ժողովուրդը կ'ուզէ ընծայել իր խստամբեր հովիւին:

Ներկայ հատորիկը որչափ վաստակաւոր եկեղեցականին խոնջած ճակտին համար լուսապսակ մ'է ի կենդանութեան հիստուած, նոյնքան ալ խթան մը այն հոգեւորական եղբայրներու, որոնք եկեղեցւոյ ծառայելու կոչումն ու նուիրումն ունին:



ԱՐԺ. Տ. ՇՍԱՅԵԱԿ ԽԱԶԱԿԻՐ
Ա. ՔՂՆՅ. ԷՔՍԷՐՃԵԱՆ

ԿԵՆՍԱԳՐԱԿԱՆ ՆՕԹԵՐ

Տ. ՀՄԱՅԵԱԿ Ա. ՔԶՆՅ. ԷՔՍԷՐՃԵԱՆԻ ԿԵԱՆՔԷՆ



ՄԱՆԿՈՒԹԻՒՆԸ

Սկիւտար Պօլսոյ այն թաղն է, որ ժամանակակից սեւրունդին պարզեւած է մեծանուն անմոռանալի մտաւորականներ և եղած է կեղրոն մը դաստիարակչական, ուր փայլած և իրենց ետեւ լուսաւոր գիծեր թողած են անմահ դէմքեր:

Հայ ամուսնացեալ եկեղեցականութեան այս ուշադրաւ դէմքն եւս, Տ. Հմայեակ Խաչակիր Ա. Քհնյ. Էքսէրճեան, ծնած է Սկիւտար, Սէլամիյէ-Տաղ-Համամ 1861 Մայիս 4ին: Հայրն էր Էքսէրճի Երեւում՝ որդի եազմաճի Գրիգորի, իսկ մայրը՝ Երանուհի, դուստր Սանտայճի Քերովբէի:

Մանկութեան առաջին տարիներէն իսկ ցոյց տուած է սուր յիշողութիւն և արտասովոր ընդունակութիւն մը ուսման: Շատ փոքր տարիքէն սկսած է յաճախել Ս. Խաչի վարժարանը: Եւ սակայն քիչ ետքը ծնողքը իրենց ընակութիւնը Նոր-Թաղ փոխադրած են, որով փոքրիկն Բարսեղ (աշխարհական անունը Տ. Հմայեակ Քհնյ.ի) եւս պարտաւորուած է ձեմարան յաճախել:

Այդ շրջանին ձեմարանի կրկին բաժանումներուն, Ծաղկոցի և Նախակրթարանի, աշակերտութեան թիւը 800ի կը հասնէր:

1871ի Նոր-Թաղի աղէտալի հրդեհէն ետքը, թէեւ իր ծնողքը Տաղ-Համամ կը փոխադրուին, և սակայն Բարսեղ հոնկէ կը շարունակէ յաճախել ձեմարան:

ՊԱՏԱՆԵԿՈՒԹԻՒՆ

Աղքատութիւն մէկ կողմէն, բնակութեան հեռաւորութիւն միւս կողմէն կը պարտաւորցնեն Երեւոմ աղան, որպէսզի պատանեակ Բարսեղը տասը տարեկանէն իսկ երկաթագործի աշկերտութեան զրկէ. այդ կերպով թէ՛ իր զաւկին այնչեստ մը սորվեցուցած ըլլալ կը խորհէր և թէ՛ անոր ստանալիք շարժականը կրնար ընտանիքին ապուրուստը զիւրացնել:

Եւ սակայն փոքրիկն Բարսեղի հոգին կապուած էր զըզրոցին: Հայրը, հետեւաբար, չկրցաւ դիմանալ իր ուսումնատենչ զաւկին աղաչանքներուն ու արցունքին և որոշեց զոհաբերմ տալ Բարսեղի փափաքներուն:

Այսպէս մինչեւ 1875 շարունակեց ձեմարանի դասընթացքը: Նոյն տարին Միհրան Դուրեան, (ապա Եղիշէ Պատրիարք Ս. Երուսաղէմի) հայերէնի ուսուցիչ կարգուեցաւ ձեմարանին:

Ուսուցչական այս կարգադրութիւնը բարեղէպ եղաւ Բարսեղի համար և զօրաւոր պատճառ մը՝ անոր զպրօցական ընթացքը շարունակելուն: Այնպէս որ Բարսեղ իր ուսումը շարունակեց մինչեւ 1878ի սկիզբը:

Միհրան Դուրեան, ինչպէս իրեն աշակերտող բոլոր ուսանողներու՝ նոյնպէս Բարսեղի վրայ եւս հօր ներգործութիւն մը ունեցած է և ազլած՝ ամէն կերպով անոր նկատարբի կազմութեան վրայ:

1877ին Միհրան Դուրեան՝ ամէն կերպով վստահ իր պատրաստած աշակերտներուն մօքի կարողութեան՝ «Շասթօպրիան—Աթալա» անուն երկը գրաբարի թարգմանելու մղեց իր չորս կարողագոյն աշակերտները, Բարսեղ Էքսէրձեան (Տ. Հմայեակ), Սիմոն Գաբամաճեան, Արմենակ Աստուածատուրեան և Յարութիւն Գազազեան:

Այս թարգմանութեան գտած յաջողութիւնը սկզբնա-

պատճառ մը եղաւ որ 1880ին Հրատարակական Մարմին մը կազմուի այս չորս պարոններու համագործակցութեամբ:

Աւելի առաջ չգացած՝ հոս մէջ կը բերենք «ԱԹԱԼԱ»-յի հրատարակութեան առթիւ Տիկին Զապէլ Տօնէլեանի (ապա Հրանդ Ասատուր) Մասիսի մէջ հրատարակած յօդուածը, ինչ որ որոշ գաղափար մը կրնայ տալ Դուրեանի աշակերտաց կարողութեան վրայ:

«ՇԱԹՈՊՐԻԵԱՆ - ԱԴԱԼԱ

«Շաթոպրիեան, ահա նշանաւոր դարու մի վախճանն աւետող մեծ ոգին, ահա տաճարներու փլատակաց վրայ, սրբազան ծաղիկներ սերմանող ձեռքը...»

«Այս գերահռչակ հեղինակին մտաց ծնունդներէն մին է որ այսօր նոր հրապոյրներով տխրացած կը մտնէ մեր սահմաններէն ներս: Ինչ որ է ոսկին ազահին համար, առաւել եւս է ընտիր մի մատենագրի թարգմանութիւնը մեր Ազգային մատենադարանին համար:

«Աղալա, անմահ բանաստեղծին հրաշալիքներէն մին է, որ բոլոր Եւրոպիոյ հիացումը գրաւած է, այսօր Հայ բանասիրաց կը ներկայի ձեռամբ եւ ճգամբ մի քանի դեռահաս սանուց ձեմարան երկսեռ վարժարանի եւ այնպիսի գեղեցիկ լեզուաւ մի եւ ոճով, որ ոչ միայն անվթար պահած է ընագրին ձեռագրին ձիրքերն, այլեւ Հիւրմիւզներու լեզուի չքնաղ փայլովն գերազանցած իմն կը թուի զընագրին: Արդէն աշխարհիկ լեզուաւ թարգմանեանեալ էր սա մի քանի տարի առաջ, սակայն այս նոր թարգմանութիւնը կրնայ արդի Հայ Մատենագրութեան փայլուն զարդերէն մին համարուիլ:

«Մեծանուն հեղինակին եռանդուն հոգին ոչ նուազ կենդանի ու փողփողուն գոյներով անդրադարձած է հայկական

հարազատ լեզուի այդ դեռափթիթ մշակներու ծեռամբ աշխատասիրութեանց մէջ. Այն մի տեսակ մելամաղծիկ բարոյականութիւնը որ կը փայլի այդ բանաստեղծական գողտրիկ վէպին մէջ, եւ որ կը նմանի ծաղկազուարճ ամայութեան մի վրայ լուսնոյն սփռած խորհրդաւոր փայլին, վսեմ կերպարան մի առած է հաւատարիմ թարգմանչաց զգոյշ եւ հարտար գրչին ներքեւ:

«Մեծ ախորժով կրկնակի կարդացի այդ թարգմանութիւնը, թէպէտ բնագիրը կը ճանչնայի արդէն եւ ճշմարիտ կ'ըսեմ թէ սքանչացալ այն յաջողակութեան վրայ, որով այդ նորատի թարգմանիչները իրենց նախահարց նման գիտցած էին մեր մայրենի լեզուի ուրիշ լեզուներէ ունեցած գերազանցութիւնն ակներեւ փայլեցնել սոյն աշխատասիրութեան մէջ եւ թէպէտ անկեղծութեան պարտքն կատարած ըլլալու համար չեմ ուզեր չխոստովանիլ մէկ քանի կէտերու մասին փոքրիկ թերութիւններ, որք թերեւս անուշադրութեան արդիւնք լինէին, այսու ամենայնիւ գործոյն ամբողջութեան վրայ սա կարծիքը գոյացաւ թէ բաւական ժամանակէ հետէ երեւցած փպասանութեանց լաւագոյնը կրնայ համարուիլ սա ըստ մեծի մասին, թէ՛ ոճերու հայկական ճշգրիտ թարգմանութեան, թէ՛ բառերու հաւատարիմ նշանակութեամբ գործադրութեան, թէ՛ ճրանսական ասացուածոց ի հայերէն վայելուչ դարձուածոց եւ թէ՛ մանաւանդ պատկերներու բնական հանգամանաց անփոփոխ աւանդութեան նկատմամբ, եւ այն սահուն գրաբարին որ ապացոյց է ձեմարանի այդ արժանաւոր սանուց իրենց մայրնի լեզուին ունեցած հմտութեան, որ մեծ պատիւ կը բերէ թէ՛ Վարժարանին եւ թէ՛ միանգամայն իրենց Արժանապատիւ ուսուցիչ Ս. Հօր.....»

«Մանկութեան ըղձալի յիշատակներ, սրտի եւ մտաց երազներ, ամբողջ կենաց պատմութիւն մի կը կացուցանեն, եւ կարի խորհրդաւոր է խորհիլ թէ, ինչ որ գործէ

մարդ ներկային անցելոյն մէջ այն անողորք գրասեղաններուն վրայ երազած է եւ ուսած:

«Այս բնական համակրութեան մի հզօր ազդեցութիւնը ունենալով յիս, անհնար եղաւ ինձ անտարբեր մնալ նորա պանծալի արդեան ի տես, եւ անհուն զոհունակութիւն զգացի, տեսնելով որ այդ անշուք յարկին ներքեւ որ արտաբուստ հայ աւերակաց տիպը կը կրէ, սնած են Բագրատունիներու աշակերտներն, ուր մի օր թերեւս հայ մատենագրութեան փառքն կացուցանելու արժանանան:

«Որքան մեծ է ուրախութիւնս ձեմարանի նորաբողոջ սանուց գեղեցիկ աշխատութեան նկատմամբ, այնքան մեծ են իղձերս նոցա այդ յառաջիմական շաւղին մէջ յարատեւութեան եւ եթէ ամէն թաղային կամ մասնաւոր հայ վարժարանաց աշակերտք այս ուսումնասէր պատանեաց օրինակին հետեւելու զովելի նախանձաւորութիւնն ունենան, այժմէն խօստումներ տուած պիտի լինին յառաջիմական յոյսերուն, որ զպրօցներէն կ'ակնկալուի:»

Տիկին Զապէլ Հ. Ասատուրի այս գրութիւնը, ինչպէս նաեւ յառաջիկայ էջերուն մէջ երեւնալիք մէկ քանի ուրիշ մէջբերումներ՝ որոշակի գաղափար մը պիտի կրնան տալ մեր ընթերցողներուն ու թատեսական թուականներու մէջ գրուած հայերէն աշխարհաբար լեզուի մասին:

«Աթալա»-յի հրատարակութենէն քիչ վերջը, սակայն, երեսում ազա աղքատութեան անդիմադրելի հարկադրանքին առջև կը պարտաւորուի ուսումնաստենչ պատանին՝ զպրօցէն և իր գրական նախասիրութիւններէն հեռացնելով՝ գործի աշխարհին մղել: Կ'որոշուի որ Բարսեղ Պայազիտ Փափագեան եղբայրներու լուսանկարչատունը աշակերտութեան երթալ:

«Աթալա»-յի խոստմնալից թարգմանիչներէն մէկը եղող հէք Բարսեղ արցունքոտ աչքերով՝ կ'երթայ ընտանեկան հարկադրանքն ու որոշումը հաղորդել ձեմարանի Տնօրէն Արժ. Տ. Խորէն Ա. Բհնյ. Փէհլիվանեանի և դասագրքերը

հաւաքելով հրաժեշտ առնելու՝ իր դասընկերներէն ու դասախօսներէն:

Հանգիպումը սրտաճմլիկ կ'ըլլայ. . . :

1878 Փետրուար 4 թուականը Էքսէրճեան Տ. Հմայեակ Ա. Քննյ.ին համար անմոռանալի սուգի օր մըն է. . . :

Այդ օրն է որ թաղային Խորհրդարանին մէջ՝ ի ներկայութեան վարժարանի Հոգաբարձութեան՝ յալահառաչ կը հաղորդէ անողոք հարկադրանքը իր Արժանապատիւ Տնօրէնին: Ներկաները խորապէս կը յուզուին և կը յորդորեն, սակայն, որ համակերպի այդ կարգադրութեան և արուեստին մէջ զարգանալու հետամտի, ինչ որ յաւագոյն ապագայ մը կրնայ ապահովել իրեն:

Արցունքոտ աչքերով կը մեկնի Էքսէրճեան և կը մտնէ իր նոր ասպարէզին մէջ:

Հազիւ երեք ամիս կը հետեւի իր նոր արհեստին, և ահա «մուհախիթ քիօտու» կոչուած մահացու հիւանդութեամբ մը անկողին կը մտնէ: Աստուծոյ ողորմութեամբ և շնորհիւ իր մօր անձնուէր խնամածութեան՝ թէպէտ կը փրկուի ստոյգ մահուան մը ճիրաններէն, և սակայն իր ապաքինում մէն 10 օր վերջ այս անգամ ալ իր մայրը, Տիկին Երանուհի, միևնոյն հիւանդութենէ կը վարակուի և նոյն տարուան, 1878, Յուլիս 25ին կը մեռնի:

Հետեւաբար թէպէտ տակաւին վատոյժ ու զողող՝ Բարսեղ կը խորհի կրկին դպրոց մտնել, բայց այս անգամ ո՛չ թէ իբր ուսանող միայն, այլ միաժամանակ՝ ուսուցիչ: Այս կերպով պիտի կարենար թէ՛ մէկ կողմէն ուսման մէջ յառաջանալ, և թէ՛ միւս կողմէն իր ու հօրը հացը ձառնել. . . :

Եւ ասիկա ճիշդ տասն և եօթը տարեկան հասակին. . . :

Այս ուզողութեամբ իր ձեռնարկները կը պսակուին և երջանիկ առաւօտ մըն ալ «Աթալա»յի թարգմանիչ ընկերներէն Սիմօն Գարամաճեան կուգայ իրեն աւետելու թէ Ս. Կարապետ եկեղեցւոյն քարոզիչը, Իզմիրլեան Սրբ. զինքը

դպրոց պիտի զնէ և միանգամայն ձեմարանին մէջ իրեն ուսուցչական պաշտօն մըն ալ պիտի տայ:

Իրապէս ալ 1878 Սեպտ. 1ին, Իզմիրլեան Սրբ.ին պաշտպանութեան տակ Էքսէրճեան ձեմարանի մէջ ուսուցչական պաշտօնի կը կոչուի: Սրտին խօսող այն նուիրական ասպարէզին կը նուիրուի խանդավառ թափով մը և՛ առաջին օրէն իսկ սկսեալ՝ իր վրայ պաշտօնական Մարմիններու ուշադրութիւնը կը հրաւիրէ: Այնպէս որ 1879 Յունուար 1էն սկսեալ իրեն կը վստահուի Ս. Կարապետ եկեղեցւոյն Թաղ. Խորհրդոյ գրադրութեան պաշտօնը եւս:

Ուսուցիչ Էքսէրճեան՝ համակ խանդ ու եռանդ՝ որպէս ուսուցիչ մօտէն կը շօշափէ առաջին ամիսներէն իսկ Հայերէն լեզուի ուսուցման համար պատշաճ դասագրքի զգալի պակասը: Ուստի կը ծրագրէ կազմել «Տարերք Մայրենի Լեզուի» անունով դասագրքերու սեռի մը: Ու կը լծուի աշխատութեան. . . :

Իզմիրլեան Սրբ.ի հոգաձուլութեամբ՝ 1880ին կը մտնէ Պէրպէրեան վարժարան որպէս ուսանող:

Այս կերպով կ'ունենայ չորս տեսակ աշխատութիւն: Առաւօտեան առաջին երեք պահերուն՝ Պէրպէրեանի մէջ կ'ՈՒՍԱՆԻ: Կէսօրէն յետոյ երեք պահեր ալ՝ ձեմարանի մէջ կ'ՈՒՍՈՒՑԱՆէ: Հանգիստի ժամերուն ու օրերուն միջոցին Խորհրդարանի գրադրութիւնը կը կատարէ: Իսկ գիշերային ժամերուն մէջ յամառ ու տենդոտ աշխատութեամբ կը շարունակէ պատրաստել իր «Տարերք Մայրենի Լեզուի» դասագրքերու սեռին:

1881ին Գավաֆեան տպարանէն լոյս կը տեսնէ վերջապէս գործին Ա. Տարին:

Ու այս կերպով տասն և ինը տարեկանէն իսկ Էքսէրճեան կը սկսի անուրն մը շինել:

Գործին Ա. ՏԱՐԻին գոտած ընդունելութենէն խրախուսուած՝ Էքսէրճեան հետզհետէ, միշտ գիշերային տքնաջան աշխատութեամբ, նոյնանուն դասագրքին Բ. և Գ. ՏԱՐԻ-

ները կուտայ հրատարակութեան: (Դ. ՏՍՐԻ ն կը մնայ ցարդ ձեռագիր վիճակի մէջ):

Արդի սերունդը շատ լաւ կը յիշէ թէ «ՏՍՐԵՐՔ ՄԱՅ-ՐԵՆԻ ԼԵՁՈՒԻ» ներք ինչպիսի՛ լայն ընդունելութիւն գտած են: Մինչեւ 1894 գործը վեցերորդ տպագրութեան հասած է: Նոյն շրջանին Միացեալ Ընկերութեան «ՄԱՅՐԵՆԻ ԼԵ-ՁՈՒ» ներք եւս՝ մասնաւոր գատններու մէջ՝ շատ սպասուած ունէին:

Անուններու այս սերձաւորութեան պատճառով՝ գործին չորրորդ տպագրութենէն յետոյ խնդրանք կ'ըլլայ Էքսէր-ձեանին, որ իր գործին անունը փոխէ: Ինչ որ սիրով կ'ընէ գունուի և դասագրքին անունը այնուհետեւ կ'ըլլայ՝ «ՏՍ. ՐԵՐՔ ԱՇԽԱՐՀԻԿ ԼԵՁՈՒԻ»:

Էքսէրձեան իր այս գործը ձօնած ըլլալով Մատթէոս Եպոս. Իզմիրլեանի, այս պարագան կը հաղորդէ իրեն նա-մակով մը, որ ի մէջ այլոց կը գրէ. —

«Կալար իմ ձեռքէս՝ մինչ դպրոցական կեանքէ այն « ինչ հեռացած էի, կալար իմ ձեռքէս՝ մինչ կ'ուզէի դեռ « ուսանիլ, կալար իմ ձեռքէս՝ մինչ անգիտանայի թէ ինչ « է մարդ եւ երկինք»:

Ի պատասխան Իզմիրլեան Սրբ. հետեւեալ գնահատու-կանը կը գրէր. —

«Ազնիւ երիտասարդ».

«Ձեր վաստակաց երախայրիքն — «Տարերք Մայրենի « Լեզուի» գործն — կընուիրէք ինձ՝ իբր այն թէ պարտք « մ'ունիք կատարելու:

«Պարո՛ն,

«Դուք որ այսօր նուիրած էք ձեր անձն բարոյական « գոհ դաստիարակութեան սեղանոյն՝ մշտավառ պահելու « համար զհուր սիրոյ կրթութեան հայկազն մանկտոյն.

«Դուք որ աշխատութեան ծանրաբեռն ժամերէն սի- « րայօժար նուիրած էք նորածիլ հայ ծաղիկներու ծաղկա- « նոցին ծառայութիւն մը ընելու, եւ դիւրին ու հրահան-

« գիչ ոնսպ մը քաղցրացնելու Մայրենի լեզուն ի քիմս « Հայկազն մանկտոյն, ձեր այս բուն բաղձանք. Պարո՛ն, « ձեր պատանեկութեան աւուրց մէջ կ'երեւէր արդէն ի « ձեզ. եթէ քաջալերեցի զքեզ յայդ՝ պարտքս կատարե- « ցի, այնու համոզմամբ թէ Դաստիարակ պէտք է հայ « ազգին, որ սիրէ զՀայն ու Հայ լեզուն. որ սիրէ զՍուրբ « Եկեղեցին Հայաստանեայց եւ ծառայէ նմա անձին զո- « հարերութեամբ:

«Դո՛ւ, մշակդ Հայ բանաւոր այգւոյն, աշխատի՛ր, քո « քրտացն կաթիլներ չեն մնար ապարդիւն. քո վաստակ « չմնար անքաջալեր. միայն թէ առջնորդէ՛ Հայ զուս- « կաց որ Հայ մնան եւ ապրին ընդ հովանեաւ Ս. Եկե- « ղեցւոյն որոց մի գաւակն ես եւ դու:

«Մաղթելով վասն ձեր ամենայն յաջողութիւն.»

* * * Հայ. Առաք. Ս. Եկեղեցւոյ Բարձրագոյն երկու Աթոռներու վրայ գահակալած երկու մեծ ժամանակակից ղէմքեր. Հոգեւոյս Տ. Տ. Մատթէոս Վեհաշնորհ Կաթողիկոս Իզմիրլեան, և Տ. Տ. Եղիշէ Եմեն. Պատրիարք Դուրեան, իրենց Պոլսական կեանքի ընթացքին, ինչպէս նախապէս այ յիշած ենք, գորեղապէս ազդած են մասնաւոր կերպով Էք-սէրձեանի վրայ:

Դուրեան Սրբ. իր ձեմարանի ուսուցչութեան շրջանին՝ սերմանած է ուրիշներու կարգին Էքսէրձեանի մտքին մէջ եւս հանրային գործունէութեան հետ առաքիլութեանց ճա-չակն ու կամքի ոյժը: Դուրեան Սրբ. իր վաղամեռիկ եղ-բօրը, Պետրոսի նամակներն ու բանաստեղծութիւնները յա-ճախ կը կարգար իր ուսանողներուն հայերէնի դասաժա-մուն: Դուրեան Սրբ. հայերէնի գասաժամը յատկապէս վե-ցերորդ պահուն նշանակած էր ժամանակացոյցին մէջ, որ-պէսզի իր ու ուսանողաց խանդավառութիւնը չ-եղձուի պա-հին աւարտու մին մղձաւ անջով:

Պետրոսի զժբախտ չիջու մին հետ՝ իր զրական արտադ-րութիւններուն և ի մասնաւոր իր գողորիկ նամակներուն

վերլուծումը գրգիռ մը եղած էին՝ Էքսէրճեանին, որպէսզի զանոնք հրատարակութեան տայ: Այս նպատակաւ խնդրած էր ուսուցիչ Միհրան Դուրեանէ որպէսզի այդ նամակները իրեն տրամադրէ ընդօրինակելու և ապա իրեն վերադարձը նելու համար:

1892ին Էքսէրճեան երկրորդ անգամ ծանրապէս կը հիւանդանայ: Մահուան մտավախութեամբ՝ Պետրոսի նամակներին իսկոյն կը գրկէ «Արեւելք»ին, որպէսզի մի գուցէ իր մահովը նոյն գրական գոհարները կորստեան մատնուին:

Բարեբախտաբար Տօքթ. Ստեփան Փաշա Արսլանեանի անձնուէր ջանքերուն շնորհիւ՝ Էքսէրճեան կ'առողջանայ և կը շարունակէ իր գործունէութեան շրջանը մինչև այսօր:

Այդ թանկագին նամակներուն ընդօրինակութիւնն ու զանոնք հրատարակել տալու յղացումը, ծնունդ կուտայ նաև Էքսէրճեանի մտքին մէջ Պետրոսի պատկերն ևս պատրաստել տալու: Ախոս՝ որ Պետրոս ունէ լուսանկար չէր ունեցած իր կենդանութեան միջոցին:

Պետրոս ինչպէս բոլոր գպրոցականութեան՝ նոյնպէս Էքսէրճեանի ալ կուռքն էր եղած: Թէ՛ անմահ բանաստեղծին գործերուն հրատարակութեան, թէ՛ անոր լուսանկարին պատրաստութեան և թէ ուրիշ ազգանուէր յղացումներուն իրագործումներուն պիտի անդրադառնանք յառաջիկայ էջերուն մէջ:

ԵՐԻՏԱՍԱՐԴՈՒԹԻՒՆ

Էքսէրճեան 1882ին Կէյվէի Միջագիւղի մէջ բացուած մասնաւոր վարժարանին Տնօրէն—Դասատու կ'ընտրուի: Կը հրատարի Նոր-Թաղի մէջ ունեցած կրկնակ պաշտօններէն, ինչպէս նաև Պէրպէրեան վարժարանէն, ուրկէ վկայական ալ ձեռք բերած էր:

Իզմիրեան Սրբ. ձեմարանի Հոգաբարձութեան վկայագրոյն մէջ հետեւեալ տողերը մակագրած է.—

«Պրն. Բարսեղ Երեւում ընդունած է եւ Կրօնից դասեր « եւ յաջողակ գտնուած ի նոսին»: 1882 Հոկտ. 2.

Իսկ ողբացեալ Ուսուցչապետն Պէրպէրեան այսպէս վկայած է.—

«Պրն. Բարսեղ Էքսէրճեան աշակերտած է վարժարանին մէջ մէկ տարւոյ չափ, այս միջոցին իր պարկեշտութեամբը եւ աշխատասիրութեամբը եւ ուշիմութեամբը Տնօրէնութեանս եւ դասախօսաց համակրանաց արժանի եղած է: Ինք կարող է արդիւնաւոր կերպով դասախօսել Հայերէն եւ Գաղղիերէն լեզուաց մէջ եւ արդէն Պ. Բարսեղ աստ ի Պօլիս իր առաջին քայլերն յաջողութեամբ առած է դասախօսութեան ասպարէզին մէջ եւ կարողութեան փորձեր տուած: Մեր եւս ապա կը յաւելումք զմեր վկայութիւն՝ ի վկայութեան Հոգաբարձութեան Նոր-Թաղի Ազգային վարժարանին, գուշակելով իրեն համար յաջող ապագայ այն ասպարէզին մէջ, ուր կը մտնէ այնքան լաւ հանգամանօք:

Էքսէրճեան երբ իր նոր պաշտօնատեղին հասնելով գործի կը ձեռնարկէ, կը տեսնէ որ Ազգ. վարժարանը փակ է և թաղային գործեր անկերպարան վիճակ մը ունին: Ուստի նորահաս երիտասարդներէ կը կազմէ Կրթասիրաց Միութիւն մը, որուն նպատակը պիտի ըլլար Ազգ. Նախակրթարանը վերաբանալ:

Նորակազմ Միութիւնը իբր հասոյթ գիւղացիներէ շաբաթական 20ական փարա կը հաւաքէ. գոյացած գումարով կը կազմէ պիւտճէն. վարժարանը կը վերաբացուի և թափառական տղաք կը լեցնեն դասարանները:

վարժարանին վերաբացումը պատճառ կ'ըլլայ որ 10 տարիներէ ի վեր անգործ նստող Թաղականութիւնը հըրաժարի: Գիւղացին Եկեղեցւոյ հոգն եւս կը յանձնէ Կրթասիրացին, որ իսկոյն կը լծուի ազգային կալուածներուն մա-

3685-70



տակարարութեան բարեփոխման: Թիթատանը վարձու կը տրուի. պիտե՛ն տակաւ կ'ընդլայնի և կրօնական ու կրթութեան գործեր փայլուն շրջանի մը մէջ կը մտնեն:

Մասնաւոր Վարժարանը, ուր ինք անօրէն էր, բացուած էր գիւղին շուրջ աղաներուն նախաձեռնութեամբ: Աստուծոյ կը թեւադրեն Էքսէրճեանի որպէսզի միմիայն իր գործով զբաղի և չխառնուի թաղային գործերու:

Իր հանդիսատի օրերուն ու ժամերուն՝ թաղային վարժարանին հաստատումին ու յառաջդիմութեան նուիրումին դէմ եղած այս դիտողութիւնները, շատ որոշ էր որ, Էքսէրճեանի պէս կրթասէր ու ազգասէր անձի մը մէջ ընդդիմութեան պիտի բաղխէին: Այդպէս ալ կ'ըլլայ: Սուր պայքարը կը սկսի շուրջը և իր միջեւ:

Էքսէրճեան տեսնելով որ Ազգային Նախակրթարանը, ինչպէս նաև Եկեղեցին, աշխատող ու արդիւնաւորող ձեռքերու մէջ են, և հակառակութեան աճումին հետ կրնան վնասուիլ, ուստի կ'որոշէ հրաժարիլ իր մասնաւոր վարժարանի տեսչութենէն. չորս ամսական պահանջքն եւս թողլով՝ Կ.Պօլիս կը վերադառնայ մէկ տարուան պաշտօնավարութենէ ետքը:

Նոյն տարին, 1883, կրկին ձեւարանի մէջ ուսուցչութեան կը կոչուի:

Իսկ 1884ին Նիկոմիդիոյ թաղային Մարմիններու բուն գիմումներուն վրայ՝ հրաժարելով ձեւարանի իր պաշտօնէն՝ կը ստանձնէ նոյն քաղաքին Ազգ. Վարժարանին Տնօրէն-Դասատուութեան պատասխանատու պաշտօնը:

Մինչև 1837 խաղաղ և գիշերաջան աշխատութեամբ՝ զինքը պաշտօնի հրաւիրող Հոգաբարձութեան հետ համագործակցաբար՝ կը բոլորէ արդիւնաւոր չորս դպրոցական տարեշրջաններ:

Եւ սակայն 1888ին մեր ազգային ցաւագին աստանիչը հոս ալ կը վարակէ Ազգ. Վարժարանը: Հոգեւոյս Ստեփանոս Արքեպս. Յովակիմեանի, պատուական, շինարար

այս հոգեւորականին շուրջ ստեղծուած Առաջնորդական-Հակառաջնորդական հոսանքները իրենց հեղեղները կը տարածեն Ազգ. Վարժարանէն ներս:

Հոգաբարձութիւնը կը հրաժարի և Հակաստեփանոսեան խմբակէն ի նորոյ կ'ընտրուի նոր Հոգաբարձութիւն մը, որուն իսէ-Ֆիւսը կ'ըլլայ... հրաժարեցնել Ստեփանոսեան անօրէնը:

Այս նպատակով նորակազմ Հոգաբարձութիւնը՝ ինքնին, Տնօրէնութեան առանց կարծիքն իսկ հարցնելու՝ ընդհանուր կառավարիչ մը կը կարգէ Վարժարանին և միւս կողմէ դիտումնաւոր չկամութեամբ մըն ալ չորս ամիսներ թօշակ չվճարեր:

Էքսէրճեան խստիւ կը բողոքէ Թաղականութեան մօտ, որ կը խոստանայ իր ամսականները վճարել՝ պայմանաւ որ վարժարանը փակէ:

Այս առաջարկին վրայ Էքսէրճեան կը յայտարարէ թէ ինք Վարժարան փակելու կոչում ու խառնածք ունեցող մարդ չէ, այլ Վարժարան բացող է: Կը մեկնի Խորհրդարանէն ու խնդիրը կը տեղեկագրէ Առաջնորդ Սրբ.ին, որ այդ օրերուն թեմական այցելութեամբ Չէնկիլէր գիւղը կը գտնուէր:

Ստեփանոս Սրբ. անմիջապէս Նիկոմիդիա կը վերադառնայ, կը հաւաքէ ժողովուրդին երեւելիները, կը խորազանէ Թաղականութեան արարքը, որ իսկոյն կը հարկարդուի հրաժարիլ: Նոր Թաղ. Խորհուրդ մը կ'ընտրուի և իրերը կը մտնեն իրենց բնական ընթացքին մէջ:

Նոր տարեշրջանին փակումին, 1888, տարեկան հարցաքննութիւնները կը կատարուին, որոնք մեծ գոհունակութիւն կը պատճառեն թէ՛ պաշտօնական Մարմիններու և թէ՛ հասարակութեան: Էքսէրճեան իր առաջին նախախայրիքը շրջանաւարաներու հոյլ մը, կը ներկայացնէ Նիկոմիդիոյ հայերուն:

Վարձատրութիւն... իր կրկին պաշտօնազրկութիւնը. . .

Առաջնորդական և Հակառաջնորդական Ապացարը կը հասնի իր ծայրագոյն աստիճանին: Առաջնորդական Էքսէր-ձեանը՝ նոր իմն Յովանն պէտք է ծով նետել յորպէսզի ծովը խաղաղի:



ԷՆՌ Է ԲՈՒՔԻՆԻՅԱՆ՝ 1878 ին

Մարմիններուն ալ, որպէսզի դադարումի վեց ամսաթօշակ-ներն եւս վճարուին:

Գաւառ. Բաղաք. Ժողովոյ խողովակով Հոգաբարձու-թեան կը հաղորդուի այս որոշումը: Ստեփանոս Սրբ.ի հա-կառակորդներէն կազմուած այս Մարմինը կը մերժէ գոր-ծադրել գերադաս Մարմինի քտոյն որոշումը, որուն վրայ Բաղաք. Ժողովն ալ իր կարգին կը լուծէ զայն: Առաջնորդ Սրբ.ը եկեղեցոյ բեմէն, իրեն յատուկ սուրճու հեղնող ու-ձով, կը ծանուցանէ այս պարագան հրապարակաւ, ինչ որ մեծ գոհութեամբ իրեն կը պատճառէ ժողովուրդին:

Պայքարի այս զարմանալի մարդը, որպիսին է Տ. Հմայ-եակ Ա. քահանայ Էք-սէրձեան, և զոր Պոլսա-հայը կը ճանչնայ իր ներկայ հեծեծող ու հիւ-ժամ ալեւորութեանը սէ-ջէն իսկ, իբր համակ ջիղ ու կորով, տարա-կոյս չկայ թէ անմըր-մունջ տեղի պիտի չտար այդպիսի քմամին անի-րաւութեան մը առջեւ:

Էքսէրձեան իսկոյն կը բողոքէ Գաւառ, Ուսումն. Խորհրդոյ, որ երկար քննութենէ մը ետքը կը վերահաստատէ զինք իր պաշտօնին մէջ և կ'որո-շէ հաղորդել պատկան

Այնպէս որ 1889ի դպրոց. տարեշրջանին սկիզբը, Էք-սէրձեան արգէն իր պաշտօնին գլուխն է նոր Թագ. Խոր-հուրդով և նոր Հոգաբարձութեամբ:

Այս անգամ, սակայն, Յովակիմեան Սրբ.ի հակառա-կորդներու փոքրաթիւ խմբակը ուրիշ մարդի մը մէջ կը փոխադրէ իր մղած պայքարը:

Բիւթանացի տարեց ազդայիններ, անշուշտ, կը յիշեն ի կոմիտիոյ վիճակին միացնելու շատ հին խնդիրը, որ տարի-ներով զբաղեցուցած է Կեդր. Վարչութիւնը: Ահա՛ այս փշոտ խնդիրն է, որ կը վերարժարուի կրկին:



ԲԱՐԱՅԵՂ ԷՖԱԿՐԻՅԱՆ՝ 1892 ին

Բողոքարկու մէկ քա-նի անձեր Պոլսոյ Կեդր. Վարչութեան կը դիմեն և անոր սեղանին վրայ կը հանեն այս խնդիրը: Հոգելոյս Աշըգեան Սրբ. Պատրիարքին գործօն ազգեցութեամբ, որ նա-խապէս Սրմաշու վանա-հայր եղած, և Ստեփա-

նոս Սրբ.ի հետ կարծեաց անհամաձայնութիւններ ունեցած էր, Կեդրոնը կ'որոշէր իբր քննիչ բարձրաստիճան եկեղե-ցական մը զրկել Նիկոմիդիա:

Եւ սակայն Կեդրոնի քննիչը ո՛չ Նիկոմիդիոյ և ո՛չ ալ Բիւթանական ընդարձակ թեմին երկրորդ կեդրոնը նկատ-ուած Ատաւ-Փազարի մէջ ընդունելութիւն կը գտնէ, ու ձեռ-նունայն կը վերագոտնայ Պօլիս:

Մեղուաջան Առաջնորդը, որ նոյն միջոցին Կէյվէի Օրթա-

գիւղին մէջ քարուկիր մեծ եկեղեցիի մը շինութեամբ զբաղած էր, երբ կը լսէ Կեղրոնի այս կարգադրութիւնը, իսկոյն հրաժարական կը մատուցանէ իր Առաջնորդական պաշտօնէն:

Գործի վրայ է հիմա էքսէրճեան Պ. Բարսեղ. . . :

Որպէս զիւանադպիրը Գաւառական Երեսփ. Ընդհ. Ժողովոյ, յենչով նաև Յովակիմեան Սրբ.ին ամենայայն ժողովրդականութեան վրայ, իսկոյն կը ձեռնարկէ պատրաստութեանը բազմաստորագիր հանրագրութեանց, ուզողւած թէ՛ Պոլսոյ և թէ՛ Նիկոմիդիոյ Երեսփ. Ընդհ. Ժողովներու: Այս հանրագրութիւններով ժողովուրդը զիսեյ կուտար և խստիւ կը բողոքէր թէ Կեղր. Վարչութիւնը իրաւունք չունի, ըստ օրինի, Վիճակի մը Առաջնորդին արարքներուն համար քննիչ զրկել՝ ցորչափ տեղւոյն Գաւառ. Ընդհանուր, կա՛մ Կրօնական և կա՛մ Քաղաքական Ժողովներու մէկէն կամ միւսէն չէ որ բողոք բարձուած է:

Մինչ Կեղրոն. Վարչութիւնը կը տեսնէ իր քննիչին յուսակաւոր ու ձեռնունայն վերադարձը, ասդին Գաւառ. Ընդհ. Ժողովը ի Նիկոմիդիա՝ մերժելով Առաջնորդին հրաժարականը՝ պատուիրակութիւն մը կը զրկէ Օրթագիւղ և փառքով կը վերահաստատէ Յովակիմեան Սրբ.ը իր Աթոռին վրայ:

էքսէրճեան՝ իբր հիացողը Իզմիրլեան և Դուբեան Սրբ.ներէն յետոյ նաև Յովակիմեան Ստեփանոս Սրբ. Արքեպիսկոպոսին՝ սրափ լայն գոհունակութիւն մը կ'ունենայ և այնուհետև չուզելով իր անձը կտուախնձոր մը տեսնել Նիկոմիդիոյ մէջ, հակառակ Յովակիմեան Սրբ.ի բուռն ստիպումներուն, 1890 տարւոյ զպրոցական տարեշրջանի աւարտումին կը հեռանայ Նիկոմիդիայէն՝ ի ձեռին ունենալով բարուք պաշտօնավարութեան վկայական մը:

էքսէրճեան Պոլիս վերադառնալէ ետքը պարբերաբար կրթական պնջածոններու կը կոչուի Պէրպլեանի, Բերայի

Նարեկեանի, Ս. Խաչի Ազգ. վարժարանի և հուսկ ուրեմն Կարապետեան վարժարանին մէջ:

Մինչև 1893 Յուլիս 13 տեւող ուսուցչական իր այս զբաղումներուն ընթացքին էքսէրճեան հրատարակած է Պետրոս Դուբեանի Կենսագրութիւնը, անոր տաղերուն Բ. տպագրութիւնը, «Շինեմք ձեմարանը» և «Շինեմք Գերեզմանատունը» գործերը:

ՔԱՀԱՆԱՑՈՒԹԻՒՆ

1893 Յուլիս 13ը նոր հանգրուան մը կը կազմէ Բարսեղ էքսէրճեանի բազմարդիւն կեանքին մէջ:

Իր ստացած ընտանեկան բարեպաշտիկ դաստիարակութեան միանալով նաև Իզմիրլեան և Դուբեան Սրբազաններու կրօնաչունչ կրթական դաստիարակութիւնը, Բարսեղի մէջ արգէն կանխապատրաստեր ու կերտեր էին հոգեւորականութեան այս ուխտեալ զինուորին խստամբեր ու պողպատեայ նկարագիրը:

Իսկ Յովակիմեան Սրբազանի շինարար ու ծառայական ոգին արգէն իսկ ջնարակեր էր իր աշխատասէր ու գործունեայ մարդու խառնուածքը:

էքսէրճեան գերազանցապէս հոգեւորականութեան պատրաստուեր էր:

Անխուսափելին կը կատարուէր. . . :

Պ. Բարսեղ Երեսուժ էքսէրճեան 1893 Յուլիս 13ին Սկիւտարի Ս. Խաչ եկեղեցոյ մէջ, նոյն եկեղեցոյ վրայ, քահանայ կը ձեռնադրուի՝ ձեռամբ Հոգեւոյս Գրիգորիս Եպս. Ալէաթճեանի և կ'անուանակոչուի Տ. Հմայեակ Քահանայ:

Քահանայական կոչումով սակայն՝ չգաղբիր կրթական ծառայութենէ: Ս. Խաչ վարժարանին մէջ կը շարունակէ միեւնոյն ժամանակ վարել իր ուսուցչական պաշտօնը մինչև 1899 տարիի զպրոցական շրջանին փակու մը:

Այնպէս որ 1878էն մինչև 1899 անընդհատ քսան և մէկ տարի ուսուցչական կեանք մըն է ունեցած էքսէրճեան և անմոռանալի յիշատակ մը թողած՝ իր բազմաթիւ աշակերտներու սրտին մէջ:

ԳՐԱԿԱՆ ՄԱՐԴԸ

Առիթ ունեցանք նախորդ էջերուն մէջ այս պատուական քահանային «Տարերք Մայրենի Լեզուի» ներու մասին մանրամասնօրէն խօսիլ և մատնանիչել այն մեծ օգտակարութիւնը, զոր իր այս դասագիրքերը ունեցան իրենց հրատարակութեանց շրջաններուն:



Նոյնպէս անցողակի անմահ վաղամեռիկ բանաստեղծին, Պետրոս Դուբանի, մասին էքսէրճեանի խոր յափշտակութիւնն ու զայն անմահացնելու մասին անուցած անշիջանելի տենչն և կենսագրութիւնն ու լուսանկարը պատրաստելու ձեռնարկները:

Քահանայակներն օրերուն արդէն էքսէրճեան մտադրած էր բեմադրել տալ Պետրոսի «ԹԱՏՐՈՆ» կամ «ԹՇՈՒՍՈՒՆՆԵՐ» թա-

Հմայեակ Բնյ. Էֆսէրճեանի նոր-նծայութիւնը

տերգութիւնը, որ մինչև այն ատեն երբեք չէր ներկայացուած:

Այս նպատակաւ Պօլոս Պալկնցի միջոցաւ բանակցու-

թեան կը մտնէ էքսէրճեան Մնակեանի խումբին հետ և Սկիւտար՝ նոյն թատերգութիւնը կը բեմադրուի իր ձեռնադրութենէն քիչ առաջ:

Թէփէի թատրոնը ներկայացումի օրը կը լեցուի խումբ բազմութեամբ, որ փութացած էր Պոլսոյ բոլոր թաղերէն:

Վարդովեան, Պետրոսի դերասանութեան բաթրօնը, այն օրը դառնապէս կուլայ՝ յիշելով թերեւս այն զոկանքներն ու նախատական վերաբերումները, զորս յայտաբերած էր Սկիւտարի Սոխակին կենդանութեան ցաւատանջ օրերուն մէջ:

էքսէրճեան շաբաթներ առաջ «ԹԱՏՐՈՆ»ի ներկայացման ազդերը հրատարակել կուտայ «Արեւելք»ի, «Մասիս»ի, «Ծաղիկ»ի և «Ճէրիտէի Շարգիլէ»ի մէջ:

«ՏԱՂԵՐ»էն և ԿԵՆՍՍՊՐՈՒԹԻՒՆ ՊԵՏՐՈՍ ԴՈՒՐԵՍՆԻ» գործերէն վերջ, այս ներկայացումը ա՛լ աւելի կը խանդավառէ, մասնաւորապէս, հայ երիտասարդութիւնն ու զրասէր հասարակութիւնը և այսպէս կը սկսի պսպղալ՝

« »

«Իսկ աննշան եթէ մնայ՝
«Երկրի մէկ խորշն հողակոյտն իմ,
«Եւ յիշատակս ալ թառամի՝
«Ա՛հ, այն ատեն ես կը մեռնիմ» ի

վաղամեռիկ հեղինակին լուսաթրթիւ յիշատակը:

Անմահն Պետրոսի կեանքին ու գործերուն վրայ մեծ հիացումով գրած են՝ Տիգրան Արփիար «Արեւելք»ի մէջ (1892—93), Հրանդ Ասատուր և Գրիգոր Զօհրապ՝ «Մասիս»ի մէջ (1893), Լիւոն Բաշալեան «Հայրենիք»ի մէջ (1892—93), Հայկ Սօճասարեան՝ «Ճէրիտէի Շարգիլէ»ի մէջ (նոյն տարիներ) և Յովհաննէս Փալազաչեան «Ծաղիկ»ի մէջ (1893):

էքսէրճեան յաջողած էր հասնիլ այսպէս իր նպատակին: Անցողակի յիշենք որ ժամանակի ընթացքին Զօպանեան



և ուրիշներ, եթէ աւելի խնամեալ ուսումնասիրութիւններ կրցած են ընել Պետրոս Դուրեանի մասին, տարակոյս չի կայ որ ամէնքն ալ մեծապէս օգտուած են Էքսէրճեանի պատրաստած Կենսագրութենէն:

Կը մնար միայն իրազործել Պետրոսի լուսանկարը պատրաստելու ծրագիրը:

Տ. Հմայեակ Քհնյ. Էքսէրճեան 1895ին Ս. Խաչ Վարժարանի գծագրութեան ուսուցիչ Պ. Մկրտիչ Պարսամեանը հետն առնելով, կը դիմէ վաղամեոիկ բանաստեղծին մօրը, եղբայրներուն և ընտանիքի բարեկամներէն ճանփէսճեանի և Լութուֆեանի՝ միասնաբար Պետրոսի դիմագծերուն մասին տեղեկութիւններ կը քաղեն: Ըստ այնմ Պարսամեան կը գծէ պատկեր մը, զոր երբ կը ներկայացնեն վշտահար մօրը.

— Պետրո՛սս... կը բացազանչէ... մի միայն քանի մըն ալ դիտողութիւններ ընելով:

Հարկ եղած երկրորդ բրբուճէ մը ետքը Sabah լուսանկարչատան մէջ Էքսէրճեանն եօթանասուն օրինակ լուսանկար պատրաստել կուտայ և այսպէսով ազգը իր անդուգական ժամանակակից բանաստեղծին նկարն ունեցած կ'ըլլայ:

Այս գործին համար անխոնջ Էքսէրճեանն՝ ամբողջ տարի մը կ'աշխատի:

Տ. Հմայեակ Ա. Քհնյ. Էքսէրճեանն երկու անգամ ալ հողեւոր հանդիսութիւններ սարքած է ի յիշատակ Պետրոս Դուրեանի:

1894ին Նոր Թաղի Ս. Կարապետ եկեղեցւոյ Քարողիչ Իզմիրիեան Սրբ.ը Էքսէրճեանն հօր խնդրանաց համաձայն հանդիսաւոր Ս. Պատարագ մատուցած է առաջին անգամ: Իսկ երկրորդ անգամ 1932ին Ս.մեն. Տ. Մեսրոպ Նարոյեան Սրբ. Պատրիարք Հայրը Ս. Խաչի մէջ մեծահանդէս պատարագած է:

1894ին հրատարակած է Խաս-գիւղի Ս. Ստեփանոս եկեղեցւոյ ձերունազարդ Տ. Գէորգ Ա. Քհնյ. Արծրունի

մահուան սոթիւ «Հանգիստ Տ. Գէորգ Աւագ Քահանայի Արծրունոյ» գործը:

1926ին պատրաստած է ու հրատարակած՝ Ս. Խաչ եկեղեցւոյ Յօրեկեանի Յիշատակարանը, որ արդիւնք է խնամեալ աշխատութեան և մանրակրկիտ ուսումնասիրութեան:

Նոյնպէս 1930ին հրատարակած է Սկիւտարի Աղքատախնամին Յօրեկիական Յիշատակարանը, դարձեալ արդիւնք տքնաջան պրպտումներու:

Ներկայիս կը զբաղի բանասիրական հսկայ գործի մը, որ երկու սուտար հատորներու բաժնուած է:

Այդ գործն է «ՄՈՎՍԷՍ ԽՈՐԵՆԱՅԻ ԵՒ ԻՐ ՔՆՆԱԴԱՏՆԵՐԸ»: Եօթը տարիէ ի վեր անսպառ ու տաժանելի յամառութեամբ, կը հետամտի հաւաքելու բոլոր եւրոպացի արեւելագէտներու և Հայ անուանի բանասէրներու թեր ու դէմքննագատականները: Ծիւրած, մաշած Էքսէրճեանն համակ խանդ ու եռանդ՝ չաքար տեսնող չքաւ որ մանուկի մը ցնծութիւնը կը յայտաբերէ, երբ Եէշիւ-քէօյ կամ... Գարթալ թալ՝ այդ ուղղութեամբ գրութեան մը գոյութիւնը իմանայ, ահա հո՛ն է Էքսէրճեանն և հատորն անութիւնը կը կայտոնէ իր խցիկը ժամանելու և հոն օգնականի մը կարգացնել և... ընդօրինակել տալու համար: Վերջերս աչքերն ալ զգալապէս տկարացած են:

1730 – 1932 թուականներուն մէջ զանազան լեզուներով հրատարակուած երեսունէ աւելի ազբիւրներէ ըրած է հաւաքումներ, որոնք ներկայիս 3500 մեծադիր էջեր զբրուած են:

Գալով կցկտուր ու լրագրական հրատարակութիւններուն՝ պօլսահայ զրեթէ բոլոր օրաթերթերուն, պարբերաթերթերուն և ամսագիրներուն մէջ 1890—1932 ստորագրած է ազգային, պատմական, կրօնական և բանասիրական շահեկան յօդուածներ, որոնց տակաւին պիտի անդրադառնանք:

ԸՆՏԱՆԻՔԻ ՀԱՅՐ

Էքսէրճեան 1887 Դեկտեմբերին կ'ամուսնանայ հան-
գուցեալ Կարապետ Պէյաղեանի աղջկան՝ Օր, Մարիամի հետ՝
կնքահայրութեամբ Եղիշէ Մ. Վրդ. Դուրեանի, որ նոյն
տարին Պարտիզակի քարոզիչ և Ազգ. Վարժարանին ալ
տնօրէնն էր:

Այս ամուսնութենէն Էքսէրճեան կ'ունենայ երկու մանչ
և մէկ աղջիկ զաւակներ: Իբր կրթասէր ու պարտաճանաչ
հայր և հայ՝ իր երկու մանչ զաւակները, Միհրանն ու Կա-
րապետը՝ նախ շրջանաւարտ կ'ընէ Ս. Խաչ վարժարանէն
1904ին, ապա Պէրպէրեանէն՝ 1903ին և նոյն տարին եր-
կուքը միասին պետական բժշկական վարժարանը կը զըր-
ուին, ուրկէ 1914ին վկայական ի ձեռին դուրս կուգան որ-
պէս բժիշկ:

Իսկ աղջիկը, Օր. Աստղիկ, շրջանաւարտ եղած է նախ
Ս. Խաչ և ապա Դպրոցասիրաց վարժարանէն: 1915ին Մարտ
10ին Էքսէրճեան զժբախտութիւնը կ'ունենայ կորսնցնելու
իր երիցուհին, որ քաղցիկեղէ կը տառապէր: Այս աղէտալի
կորուստը մեծապէս կը ցնցէ իր առողջական վիճակը և սա-
կայն հաւատք, կամք ու կորով կուգան իրեն զօրավիգ հան-
դիսանալու ու զաւակները առած իր թեւին տակ, մայրական
պարտականութեան ևս կ'երկարէ իր պարտասուն վիզը:

ՀԱՆՐԱՅԻՆ ՄԱՐԴԸ

Տ. Հմայեակ Ա. Քչնյ. Էքսէրճեանի բազմաբեղուն
կեանքը չէ սահմանափակուած միայն ուսուցչի, եկեղեցա-
կանի և գրչի մարզու ծիրին մէջ: Ան լայնօրէն, գիտակցօ-
րէն, ձեռնհասօրէն և խստամբեր անաչառութեամբ մը

նուիրուած է նաեւ հանրային գործունէութեան և ծառա-
յականութեան:

1901ին ընտրուած է Սկիւտարի երից թաղից Աղքատա-
խընամ Մարմնոյ նախագահ, պաշտօն մը, զոր մինչեւ այսօր,
մերթ ընդմիջաբար, կը շարունակէ անձնուիրութեամբ եւ
խղճամտօրէն:

Աղքատախնամի գործունէութեան լայն պարունակին
մէջ ի յայտ եկած է արեւու լոյսին պէս պայծառ թէ Էք-
սէրճեան, ընչատեսաց այս եկեղեցականը՝ աղքատներու,
որբերու հանգէպ բուղիս սիրտ մը, զգայուն հոգի մը և ան-
տրտունջ նուիրում մը ունի, որոնց բերումով զինքը այսօր
«Յուզարա պապար» կը կոչեն:

1921ի Իճատիյէ-Սէլամսըզի մեծ հրդեհին Էքսէրճեանի
նախաձեռնութեամբ կազմուած է Հրկիզելոց Յանձնաժողով
մը, որուն նպատակն էր աղէտեալներու անմիջական պէտ-
քերուն հասնիլ: Սոյն Յանձնաժողովը աւելի զօրաւոր ոյժե-
րով վերակազմուած է քիչ վերջ և օրհնութիւն մըն է եղած
աղէտեալներուն:

Նոյնպէս 1921ին՝ Թաղ. Խորհրդոյ հաւանութեամբ՝ կազ-
մած է գերեզմանատան բարեկարգութեան համար Յանձ-
նաժողով մը, որուն ինք նախագահն է: Սոյն Յանձնաժողո-
վին համար ալ պատրաստած ու Խառն ժողովէ վաւերա-
ցընել տուած է կանոնադիր մը, որուն տրամադրութեանց
համաձայն նոյն նպատակաւ կազմուած Յանձնաժողովներ
մինչեւ այսօր կը շարունակեն հոգ տանիլ ու հսկել գերեզ-
մանատան բարեկարգութեան:

1898էն մինչեւ 1908 օրինական ընդհատումներով յա-
ջորդաբար անդամակցած է Դատաստանական Խորհրդոյ:

1911 մինչեւ 1914 Կրօն. Ժողովոյ քարտուղարութիւնը
վարած է:

Իսկ 1908էն մինչեւ այսօր՝ օրինական ընդմիջումներով,
Կրօնական Ժողովներու անդամակցած է: Ներկայիս ալ կ'ա-
տենապետէ նոյն Ժողովին կատարեալ ձեռնհասութեամբ:

1908ին, Օսմանեան Սահմանադրութեան հռչակումին վաղորդայնէն իսկ ընտրուած է Ընդհանուր Ժողովոյ անդամ և հանդիսացած է նոյն Ժողովին ամէնէն ուշագրաւ զէմքերէն մին:

Ազգային օրէնքներու խոր ու նուրբ հմտութիւնով, ատենագրութիւններու և անցեալ միջադէպերու սուր յիշողութիւնով, անխոնջ պրպտումներու արդիւնք փաստաթուղթերու պարութեամբ զինուած ու զրահուած այս անխոցելի զէմքը, միշտ իր հակատակորդներուն իսկ յարգանք ներշնչած է Ընդհ. Ժողովի փոթորկալից նիստերուն պահուն:

ՀԵՏԱՔՐՔՐԱԿԱՆ ԴՐՈՒԱԳՆԵՐ

Մուշեղ ԵՄ-ԵԱՍ. Սերովբեանի՝ Կրօն. Ժողովէն վաւերացուած՝ քրիստոնէական դասագրքին զէմ 1911ին «Սուրհանդակ»ի մէջ Էքսէրճեան յօդուածաշարք մը հրատարակած և փաստարկած է թէ ինչ ինչ կէտեր անհամաձայն են Հայ. Եկեղեցւոյ վարդապետութեանց: Ապա Կրօն. Ժողովին բողոք մատուցած է այդ դասագրքին վաւերացումին զէմ: Իր բողոքներուն անհետեւանք մնայովը՝ Էքսէրճեան այս անգամ հարցը ներկայացուցած է Ընդհանրական Հայրապետին, որ յանձնարարած է Կրօն. Ժողովին այդ զիտողութեանց նկատառումը: Ասոր վրայ նոյն Ժողովը յետ քննութեան որոշած է ջնջել Սէրովբեանի դասագիրքը կրօն. դասագիրքերու ցանկէն:

* * *

1907ին դարձեալ Մուշեղ ԵՄ-ԵԱՍ. Սերովբեան Հոգեգալստեան մասին գայթակղական յօդուածներ գրած էր: Տ. Հմայեակ քահանայ՝ իբր անդամ Կրօն. Ժողովոյ՝ ամենախիստ բողոք բարձած է այդ հրատարակութեանց զէմ և առաջարկ բերած՝ որպէսզի պատժուի: Ժողովը՝ հետեւանք

տալով իր առաջարկին՝ զրկած է Մուշեղը Պօլսոյ Պատրիարքութեան իրաւասութեան ներքեւ գտնուող եկեղեցեաց քարոզչութենէն:

* * *

1908ին Կրօնական Համագումարը նիստի կը հրաւիրուի Կրօն. Ժողովոյ ընտրելիներու եռապատիկ ցանկը քուէարկելու: Համագումարին կը նախագահէ Պատր. Տեղապահ Եղիշէ Արքեպս. Դուբանի: Հոն է նաև Մուշեղ ԵՄ-ԵԱՍ.: Էքսէրճեան զիտել կուտայ թէ Համագումարը կը կազմուի Քարոզիչներէ, Առգ-երէցներէ և Եթոսականներէ, մինչդեռ Մուշեղ՝ Կրօն. Ժողովոյ որոշումով զրկուած է Պատրիարքութեան իրաւասութեան տակ գտնուող եկեղեցիներու քարոզչութենէն: Ասոր վրայ նախագահ Սրբ.ը կը ստիպուի Մուշեղը իր քովը կանչել և իր հեռացումը զգացնել: Ատկէ վերջը կը սկսի ցանկին քուէարկութիւնը, որուն միջոցին բարձրագոյն քուէն կը ստանայ Իզմիրլեան Սրբ. և անկէ մէկ քուէ պակաս՝ Էքսէրճեան:

* * *

1910ին «Ժամանակ»ի մէջ դաշնակցականներու՝ ազգային գործերու մէջ ապօրինութիւններուն և Աղթամարայ մէջ ալ կատարած խժգժութիւններուն զէմ բուն յօդուածներ գրած է: Նոյն խարանիչ ոճով եւս յարձակում գործած է Ընդհ. Ժողովոյ մէջ:

Ասոր վրայ Տղերք կ'որոշեն զիմել... սօփայի: Երկու դաշնակ. ահաբեկիչներ, Սէլամսըզ, Աճը-Պատէմ փողոցին մէջ Էքսէրճեանի վրայ յարձակում կը գործեն: Եւ սակայն աննկուն եկեղեցականը վիրաւոր վիճակի մէջ յաջորդ ուրբաթ դարձեալ կու գայ Երեսփ. Ժողովի՝ ալ աւելի բուն ու աներկիւղ մղելու համար իր բացած պայքարը:

* * *

1908ին, Օսմ. Սահմանադրութեան հռչակումին յաջորդող օրերուն մէջ, օր մը մինչ Խառն ժողովը նիստ գումարած էր Ղալաթիոյ խորհրդարանը, Երուսաղիմայ խնդրոյն մէջ Ղեւոնդեան եղող խումբ մը ազգայիններ, կ'ուզեն սրահ մտնել և կը պահանջեն որ Օրմանեան Սրբ. հրաժարի: Պալագեան Ծ. Վրդ. ի դիմաց ժողովոյ՝ դուրս ելնելով բողոքողներէ պատուոյ խօսք կ'առնէ որ ցոյց կամ նախատինք չընեն: Երբ հոգելոյս Մեծ Պատրիարքը իր հրաժարականը կուտայ և ժողովականները սրահէն դուրս կ'ելլին, բողոքողները, որ Ընդհ. ժողովոյ սրահը կը գանուէին. կը սկսին նախատական խօսքերով ցոյց ընել: Ժողովականներու ընդհանուր լուս անտարբերութեանը մէջէն, ահա կը լսուի Էքսէրճեանի սղենտորեան ձայնը, որ արգար զայրոյթով մը կը յիշեցնէ վայրկեան մը առաջ իրենց տուած պատուոյ խօսքին անարգ դրժումը: Պատմութեան անաչառ ընթացքը ոսկի տառերով արձանագրած է թէ Տ. Հմայեակ Ա. Քննյ. Էքսէրճեան որչա՛փ իրաւունք ունէր առանձինն, սոսկ անհատ մը, ընդհանուր նախատանաց թոհուբոհին մէջ վայրապար վարկապարազի ինկողին կուշտը կանգնելու:

* * *

1910ին իր շրջանը բոլորող կրօն. ժողովին տեղեկագրին պատրաստութիւնը Տ. Հսայեակի կը յանձնուի: Սոյն տեղեկագրոյն մէջ Օրմանեան Սրբ. ի մասին խօսած պահուն անոր քննադատելի գործերուն առընթեր Ա.ԶԳՕԳՈՒՏ բաներ ալ ըրած ըլլալը կը յիշատակէ Էքսէրճեան: Ատենապետ վահրամ Եպս. Մանկունի կը թելադրէ որ Ա.ԶԳՕԳՈՒՏ Էքսէրճեանը ջնջուին տեղեկագրէն որպէսզի կարելի ըլլայ անգամներու բոլորին ալ ստորագրութիւնները առնել: Էքսէրճեան

տեղի կուտայ և սակայն երբ Օրմանեանի գործերուն Քննիչ Յանձնաժողովին տեղեկագիրը կը կարդացուի, Գրիգոր Զօհրապի պաշտպանողականէն վերջ՝ բեմ կը բարձրանայ Տ. Հմայեակ, մի առ մի կը թուէ այդ տեղեկագրին թերի կէտերը և առիթէն օգտուելով, կը սկսի Օրմանեան Սրբ. ի Ա.ԶԳՕԳՈՒՏ գործերուն ներքողը հիւսել: Ատենապետ Հայկ Խօճասարեան հրապարակաւ կը գովէ անկողմնակալ, անաչառ և ուղղամիտ ժողովականը յանձին Էքսէրճեան քահանայի:

* * *

1913ին թաղային վէճի մը պատճառաւ Վարչութեան կողմէ երկու քննիչներ Ս. Խաչ կը զրկուին: Էքսէրճեան քահանային շրջահայեաց ընթացքով ծայրայեղութիւններու առաջքը պահ մը կարելի կ'ըլլայ առնուիլ, սակայն քննիչներուն մեկնումէն վերջ բողոքողները ամբոխավարութեան զիմելով, կ'ուզեն քահանաներն ու ժամկոչները եկեղեցիէն դուրս հանել ու կը պահանջեն եկեղեցւոյ բանալիները Աագերէց Տ. Հմայեակէն: Էքսէրճեան իսկոյն կ'ընդգլի այս քմահաճ ու խուժանային պահանջումին առջեւ ու կը պոռայ կատաղած ամբոխին երեսն ի վար. —

— «Այս եկեղեցւոյն աղբին առջեւ պատասխանատուն ե՛ս եմ. անպաշտօն անձերու բանալի չեմ կրնար յանձնել և ո՛չ ալ թոյլ կուտամ որ քահանաներ ու ժամկոչներ դուրս հանուին: Նախ իմ դիակա կը փռէք այս սրբավայրին սեմին առջեւ և ապա բանալիները կ'առնէք...»:

Բողոքողներ այս տպուորիչ ու անձնուրաց ժէսթին առջեւ տեղի կուտան ու կը հեռանան՝ Մագթաղենացին քարկոծելու համար Յիսուսի առջեւ ելած և ապա գլխիկոր հեռացած իսրայէլացիներու պէս:

* * *

Մտքերու մէջ յաւէտ յիշատակելի կը մնան ու ատենագրութեանց մէջ ալ որոշապէս քանդակուած են «բոց» ու «գոց»ի խնդրոյն մէջ Միհրան Շիրինեանի և ուրիշներու կարգին՝ Տ. Հմայեակ Ա. Քհնյ. Էքսէրճեանի այն բուն ու անվեհեր բողոքներն ու կեցուածքը, որոնց պատճառաւ այնքան հալածուեցաւ այս անձնուէր եկեղեցականը Դաշնակցականներու կողմէ՝ ըլլա՛յ ժողովոյ մէջ, ըլլա՛յ անկէ դուրս:

* * *

Զմայելի հակադրութիւն մը և օրինակելի դուզակչիո մը կը յօրինէ կեցուածքը Տ. Հմայեակ Քհնյ. Էքսէրճեանի՝ մէկ կողմէն Դուրեան, Իզմիրեան և Յովակիմեան Սրբ. Արքեպիսկոպոսներու և միւս կողմէն Գէորգ Արքեպս. Արսլանեանի հանդէպ: 1897ին «Սուրհանդակ»ի մէջ կուռ ու փաստալից յօդուածաշարքով մը Ստեփանոս Արքեպս. Երզնկացի, Հոգեւոյս Առաջնորդին կենսագրական գիծերը, ազգօգուտ շինութիւնները պանծաղնող և վայելած անսահման ժողովրդականութեան ներբողը հիւսող Էքսէրճեան, երեսուն տարի ետքը, 1927ին, թէ՛ «Ժամանակ» օրաթերթին մէջ և թէ՛ Ընդհ. ժողովոյ ատենանին առջեւ կորովի, անվերապահ ու անվեհեր պայքար մըն է մղած Պատր. Տեղապահ Դէորգ Արքեպս. Արսլանեանի դէմ, ինչպէս ցոյց կուտան Ընդհ. ժողովոյ արձանագրութիւնները և օրուան մամուլը: Աւասիկ այն թուականին, երբ Արսլանեան Սրբ. կը զբաւէր Տեղապահական Աթոռը:

Իսկ 1929ին Յունիս 4ին կրօն. ժողովի համար եկեղեցական Համագումարի պատրաստած եռապատիկ ցանկը երբ Ընդհ. ժողովի մէջ կարգացուեցաւ, այդ միջոցին Էքսէրճեանի ըրած օրինական մէկ զիտողութիւնը «Ազգարար»

նիւթ ընկով, իր Յունիս 5ի թիւին մէջ, ի մէջ այլոց հետեւալ տողերը զբաւ է.—

«...Ո՛չ, եթէ խելք չըրին, — ակնարկութիւն Ընդհ. ժողովոյ անդամներուն, — գոնէ սթափէին սա ծերունի քահանային երիտասարդական շարժումներն վրայ: Զեռքն ու ոտքը կը դողային, բայց չդողաց ձայնը, երբ կարգը եկաւ հրապարակաւ պոռալու իր բարձրատիման կարգակցին երեսին՝ — ակնարկութիւն Գեորգ Արքեպս. Արսլանեանի — թէ չկրնար թեկնածու ներկայանալ կրօն. ժողովի համար, քանի հաշիւները լուացած չէ: Անոնք նոյնիսկ, որոնք հոգի կուտան խօսելու եւ իրենց վրայ խօսեցնել տալու, խելք չունեցան օգտագործելու հրաշալի առիթը:»

* * *

Ազգ. տարեգրութեանց մէջ յաւէտ յիշատակելի պիտի մնայ Էքսէրճեանի մատուցած մէկ բանածեւը, որով կ'առաջարկէր Ընդհ. ժողովին որպէսզի վարչութեան նախագահը, Գէորգ Արքեպս. Արսլանեան, պատասխանատու նկատուի նիւթապէս՝ հարիւր հազար օսկիէ աւելի գումարին, որուն հաշուեկշիռն ալ կցեր էր իր բանածեւին:

Աւեր իրեն կը հարցուի թէ ինչո՞ւ իր պատկանած խմբակին բանածեւէն տարբեր բանածեւ մը կը ներկայացընէ ժողովին, Էքսէրճեան կը պատասխանէ.—

«— Գիտէի որ բանածեւս ոչ իսկ քու է մը պիտի շահի, եւ սակայն թող ապագայ սերունդը գոնէ պատեհութիւն տեսնալ ուսումնասիրելու և վճռելու թէ Արսլանեան Սրբ. որչափ պատասխանատու է գրամական այս գործերուն մէջ:»

* * *

Էքսէրճեանի նկարագիրն ու սկզբունքապաշտ խառնումքը ցայտուն կերպով ի յայտ կուգան այս դրուագներէն, զոր դեռ կարելի էր շատ երկարել:

ՊԱՏՈՒՈՅ ՏԻՏՂՈՍՆԵՐ

1913 Դեկտ. 11ին օրուան Պատրիարքը, Կրօն. Ժողովոյ որոշումով, Ս. Խաչ եկեղեցւոյն Աւագերէցութեան կոչած է Էքսէրճեանը: Ահա թէ ի՞նչ կը գրէ Պատրիարք Սրբ. ք այս առթիւ տրուած կոնդակին մէջ.

«...Զի տեսաք զքեզ ջանադիր կեալ անբասիր կենօք եւ հետամուտ յընտիր կացուցացել զանձնդ յօրինակ հաւատացելոց եւ ի քաջալերութիւն եղբարցդ՝ արժան դատեցաք ամբառնալ զքեզ յԹոռ Աւագերէցութեան եւ շնորհել զքեզ այսու օրհնութեան կոնդակաւ մերով զպաշտօն գրլխաւորութեան ի մէջ դասու քահանայից Ս. Խաչ եկեղեցւոյ Սկիւտարի:»

1913 Ապրիլ 6ին Կ. Պօլսոյ Պատրիարք Տ. Յովհաննէս Սրբ. Արքեպս. Արշարունի՝ Տ. Հմայեակ քահանայի աւագութեան աստիճանի և ծաղկեայ փիլօն կրելու արտօնութեան համար շնորհած է պատրիարքական կոնդակ, ուր կը գրէ.—

«Յորմէհետէ ընկալար զպաշտօն քահանայութեան արժանի զանձնդ կացուցեր հանուրց քոյով բարւոք ընթացիւք. խորհեցար զպայծառութենէ Ս. Տանարին Աստուծոյ եւ աւանդապահ կարգաց եւ կանոնաց կացուցեր զանձն քո ի նմին, հանոյ թուեցաւ մեզ այսու կոնդակաւ շնորհել զքեզ... եւն:»

1917 Յունիս 21ին Կաթող.-Պատր.-Փոխանորդ Տ. Գարբրիէլ Սրբ. Արքեպս. Ճէվահիրճեան իր գոհունակութեան կոնդակին մէջ կը գրէ.—

«...Զի յորմէ անտի կոչմանդ ի Ս. Աստիճան քահանայութեան ոչ միայն ի նուիրական պաշտօնիդ ջանաս բարւոք հովուութեամբ մատակարարել զհոգեւոր պետս ժողովրդեանդ, այլ եւ ցանկաս եւ գուն գործես վասն պայ-

ծառութեան Ս. Եկեղեցւոյ վարելով զովելի փութաջանութեամբ պաշտօն աւագերէցութեան երկոցունց եկեղեցիաց Սկիւտարու եւ նախանձախնդիր զանձնդ կացուցանես եկեղեցական կարգաց եւ կանոնաց եւ այսպէս բարի օրինակ հանդիսանաս յար եղբայրակցաց քոց, արժան համարեցաք այսու օրհնածիր կոնդակաւ յայտ առնել զքեզ զգոհունակութիւն մեր ի քաջալերութիւն ի յարատեւել ի նմին բարւոք պաշտօնավարութեան:»

Իսկ 1933 Նոյեմբեր 13ին Կ. Պօլսոյ Պատրիարք Ամեն. Տ. Մեսրոպ Ս. Արքեպս. Նարոյեան Տ. Հմայեակի լանջախաչի տուուչութեան կոնդակին մէջ կը գրէ.

«Ի նկատ առեալ զբազմամեայ վաստակս եւ զբարւոք ծառայութիւնս քո ի պաշտօն քահանայութեան, յոր կոչեցար ի Հոգւոյն Սրբոյ, եւ զի մշակն արժանի է վարձուց որ ըստ բանի Տեանն, այսու Պատրիարքական կոնդակաւ շնորհեմք զքեզ իրաւունս կրելոյ ի կուրծս զլանջախաչ քահանայական առանց ծուլեալ պատկերի Փրկչին:»

ՀԱՍԱՐՍԿԱԿԱՆ ԾԱՌԱՅՈՒԹԻՒՆՆԵՐ

Սօսած ենք իր տեղին մամուլի միջոցաւ ունեցած իր ընդարձակ գործունէութեան մասին: Էքսէրճեան ասոնցմէ զատ 1908ին «Տաճար» անունով կրօնաթերթի մը արտօնութիւնը առնելով, զրաձ է զայն Պատրիարքարանի արամագրութեան տակ՝ ասոնց ամենադոյզն զրամական ակնկալութեան ու վարձքի, ինչպէս ընկալեալ սովորութիւն և ամենատարրական իրաւունք է: Այս թերթը նախ հրատարակուեցաւ Գարեգին Եպիսկոպոսի և ապա Տ. Զարմայր Կէզլիբեան քահանայի (այժմ Ծ. Վարդապետ) խմբագրապետութեամբ, մինչեւ 1915: Իսկ կարճ ժամանակ մըն ալ ու-

րիչ խմբակ մը հրատարակեց թերթը և ապա զազրեցաւ :
* * * Տօքթ, Թորգոմեանի Ազգ. Հիւանդանոցի Հոգս-
բարձու թեան Ատենապետութեան շրջանին, նոյն պատուա-
կան մարդուն նախաձեռնութեամբ՝ ջլախտաւորներու բա-
ժինին մէջ նուագածուներու անձնուէր խումբ մը շաբաթն
անգամ մը կը նուագէր. ուրկէ բախտի այդ անժառանգները
կ'օգտուէին մեծապէս : Ժամանակի ընթացքին այդ յոյժ
օգտակար ձեռնարկը վերջ գտաւ : Այս պարագան մեծապէս
ազդած ըլլալով Տ. Հմայեակի բուզիս սրտին, «Ժամանակ»-ի
մէջ յուզիչ կոչ մըն է ըրած, ուրկէ բարեսէր ազգային մը
իր կարգին ազդուելով բաւական թուով րլաքներով կրօմօ-
Փօն մը նուիրեց հիւանդանոցին : Իսկ հիմա Տնօրէն Պ. Գուր-
գէնի ռատիօյին շնորհիւ, մերթ երաժշտութիւն կը վայելին
խեղճերը :

* * * Էքսէրճեանի շատ կարեւոր մէկ գործն է՝ քահա-
նայական ծխական խնդրոյն ռեսուրսասիրութիւնը . 1243ին
Կոստանդին Կաթողիկոսին օրով՝ Սիսի Բ. ժողովին մէջ հաս-
տատուած է տէրունի ծխական զրութիւն մը, զոր մանրա-
կրկիտ պրպտումներով ստուգելէ յետոյ . ուզեց նոյն զրու-
թիւնը հաստատել : Այս նպատակաւ 1932 Յուլիս 31 և Օ-
գոստոս 2 թուակիր 6 և 8 թիւ «Արեւելք»ներու մէջ հրա-
տարակած է շահեկան ռեսուրսասիրութիւն մը : Անկէջ յե-
տոյ այս հարցը բերաւ թէ՛ Քհնյ. Միութեան Ընդհ. ժողու-
վին և թէ՛ Կրօն. ժողովին սեղաններուն վրայ : Հոգեւոր
Իշխանութեան մէջ կազմուած յանձնաժողով մը այդ զրու-
թեան գործադրութեան մասին Էքսէրճեանի բերած կանոն-
նագիրը նկատողութեան առաւ և ինչ ինչ փոփոխութիւն-
ներով մատոյց Կրօն. ժողովին, որ իր կարգին վաւերացուց
զայն և որոշեց գործադրութեան գնել :

Այս խնդրոյն շուրջ իր և ուրիշ կարեւոր ժողովականի
մը մէջ կարծիքի հակառակութիւն մը կը գոյանայ նիստի
միջոցին : Տ. Հմայեակ ջլայնացած պահ մը ժողովարարն
կը թողու . իր մտերիմ ընդդիմախօսը քանի մը բոպէ վերջ

ծերունազարդ Տ. Հմայեակի քովը կուգայ և կ'ուզէ ողորջել :
— Տ. Եղբայր, ժողով ուրի՛շ, բարեկամութիւն ուրի՛շ,
կը պտտասխանէ Էքսէրճեան և կը յաւելու, «ա՛ռ նայիմ,
սիկա մըն ալ դուն ծխէ՛, դուն ալ յուզուեցար : Դրուագ
մը անա, ուր կը ցոլայ «ժողովական»-ի զմայելի հաւու-
նութիւն մը :

ՄԱՄՈՒԼԻՆ ԳՆԱՀԱՏՈՒԹՅՈՒՆԸ

Տ. Հմայեակ Քհնյ. ի գործունէութեան և նկարագրին
պատկերացումը հրատարակած են «Ժամանակ», «Նկար»,
«Ազգարար» և «Նոր Հոյս» թերթերը : Հոս նոյնութեամբ
կ'արտագրենք զանոնք կատարեալ գաղափար մը տալու հա-
մար անոր նկարագրին մասին :

* * *

«Ժամանակ» 1927 Յունիս 8ի թուոյն մէջ «Տ. Հմայ-
եակ Ա. Քհնյ. ի կենսագրական գծերը» վերնագրին տակ Պ.
Պարոյր Քէչեան հետեւեալ տողերը կը գրէ .

«Մէկն է այն պարկեշտ, կորովի, լուսամիտ ու առա-
քինի քահանաներէն, որոնք հայ տարեգրութեան մէջ մտա-
նաւոր անուն մը թողուցին, ինչպէս Հիւնքեարպէյէնտի,
Մկրեան, Օրթագիւղի Տ. Սահակ եւ դեռ ուրիշներ. Ասոնք
իրենց քահանայագործութեան մէջ անբասիր կեանք մը վա-
րելէ գատ, եղած են ազգային պարկեշտ ժողովականներ,
հեղինակաւոր Հայեր : Անոնց թիւին վրայ արժանաւորա-
պէս պէտք է աւելցնել Տ. Հմայեակ Ա. Քհնյ. Էքսէրճեա-
նը, Սկիւտարի Ս. Սաչ եկեղեցւոյ բանասէր եւ հմուտ ա-
ւագերէցը, որ իր խուցին մէջ քաշուած կ'ուսումնասիրէ,
կը պրպտէ, կը թղթատէ մատեաններ, արձանագրութիւն-
ներ, պաշտօնական հին փաստաթուղթեր եւ միշտ ազգա-

յին օգտակար աշխատութիւն մը մէջտեղ կը հանէ յանախ կորուստէ փրկելով տոհմային շահեր:

«Տ. Հմայեակ Բնյ. Էքսէրճեանն է որ պատրաստած է յարատեւ եւ տքնաջան աշխատութեամբ մը Սկիւտարի Ս. Խաչ եկեղեցւոյ յորելինական հանդիսութեանց առթիւ ճոխ յիշատակարան մը, զոր արդարեւ կ'արժէ ուսումնասիրութեան առարկայ ընել, գաղափար մը կազմելու համար թէ Սկիւտար ո՞րպիսի լուսաւորութեան կեդրոն եղած է դարերէ ի վեր:

«Տ. Հմայեակ Ա. քնյ. վարած է Ազգ. պաշտօններ, մի՛շտ պաշտպանելով ազգային շահերը, աղքատին, անուրիսին, անպաշտպանին իրաւունքները եւ դէմ կեցած է օրինաւորապէս այն սանձարձակ գործունէութեանց, որոնք նոյնիսկ Ընդհ. Ժողովի մէջ տեղի կ'ունենային եւ հոն Տ. Հմայեակ Ա. քնյ. ազգային օրէնքներու իր խոր հմտութեամբ լեցուցած է շատ մը պերճախօս ժողովականներ, որոնք ազգային շահերը ուզած են կորստեան մատնել:

«Եւ այս կերպով Տ. Հմայեակ Հայր անվեհեր, օրէնսգէտ, օրինապահ, արդարախօս մէկ անդամը եղած է անցելոյն մէջ Ընդհ. Ժողովին եւ այսօր ալ նոյն կորովի ժողովականն է, որուն կուռ յօդուածներն ու օրինական բացատրութիւններն այնքան ուշադրութեամբ եւ գնահատումով կը կարդացուին միշտ:

«Տ. Հմայեակ Հայր լեզուներու, դպրութեանց եւ աստուածաբանութեան հմուտ ներհուն եկեղեցական մըն է, որ չըլլալով զանգարածաբոյց, իր հմտութիւնը տարածած է ուսուցչական ասպարէզին մէջ ըլլալով իր առաջին կըրթութեան օրրանին՝ ձեմարանի, ինչպէս նաեւ իր երկրորդ կըրթութեան բուրաստանին՝ Պէրպէրեանի ուսուցիչ, Նիկոմիդիոյ ազգային վարժարանին աւագ-ուսուցիչ աշխարհականութեանը ատեն, Բարսեղ Էքսէրճեան անունով, ու յետոյ քահանայութեան ժամանակ կրօնի ուսուցիչ Կարապետեան երկրորդական վարժարանին: Ուսուցչական պաշ-

տօնավարութեանց շրջանին Տ. Հմայեակ Հայր Էքսէրճեան միշտ յարգուած է իբրեւ ներհուն ուսուցիչ մը հայ. եւ ֆրանսերէն լեզուներու ու մատենագրութեանց, ինչպէս նաեւ կրօնագիտութեան: Հեղինակած է հայ լեզուի ընթերցանութեան համար «Տարերք Մայրենի լեզուի» անունով դասընթացք մը. որ գնահատուած է դպրոցավարներու կողմէ:

«Տ. Հմայեակ իր աշխարհականութեան ատեն՝ դեռ երիտասարդ հրատարակած է գրքոյկ մը «Շինենք մեր գերեզմանատունը» անունով: Այդ փորձը նոյն թուականներու մէջ զարկ տուած է Ս. Կարապետ եկեղեցւոյ քարոզիչ Հոգելոյս Տ. Մատթէոս Իզմիրլեանի եւ Ս. Խաչի քարոզիչ եւ նոյն թուականին Կրօնական Ժողովի ատենապետ Հոգելոյս Տ. Գրիգոր Եպս. Ալեաթեանի (Թուչնիկ), որոնք այն ատեն գլուխ կը հանէին Սկիւտարի գերեզմանատան որմափակումը:

«Տ. Հմայեակ Ա. քնյ. Էքսէրճեան պատրաստած է նաեւ մեր անմահ բանաստեղծ Պետրոս Դուրեանի կենսագրութիւնը, որ հայ մատենագրութեան մէջ կարեւոր տեղ մը զբաւած է. իբրեւ հիմնակէտ ծառայելով Դուրեանի մասին գրուած ուսումնասիրութիւններու:

«Ահա այսպիսի գործունեայ, աշխատասէր ու ազգանուէր եկեղեցական մը եւ անաչառ ու անկաշկանդ ժողովական մըն է որուն ազգ. գործերու մասին ունեցած հրմտութենէն եւ փորձառութենէն մեծապէս պիտի օգտուին թէ՛ Ընդհ. Ժողովը եւ թէ՛ Կրօն. Ժողովը, որուն անդամ ընտրուեցաւ նախորդ կիրակի օր:

* * *

1933 Յուլիս 18ին «Նկար»ի մէջ Աշոտ Բէչեան Տ. Հմայեակի նկարագրի մասին կը գրէ հետեւեալը:

«Սարսափով, բայց մանաւանդ պատկառանքով կը մօ-

տե՛նանք այս անունին: Խրոխտ, անկախ, անվեհեր այս եկեղեցականին, որուն վրայ ակնարկդ կը հանգչի սիոփուած. արքի վեղարացից բարձունքի մը ամայութեանը վրայ թափառելէ վերջ: Ահաւասիկ արթուն, քաջասիրտ պահապան մը, որուն կրնաս վստահիլ եկեղեցիդ, համոզուած որ իր սրբութեանը եւ անբժութեանը մէջ անխոցելի պիտի պահէ: Եկեղեցական կոչումը պայմանադրական ձեւապաշտութեան վերածող եւ իրենց սքեմին նուիրականութեան հանդէպ խղճահարութիւն չզգացող կարգ մը արհեստաւորներու աչքին առջեւ պէտք է ուրուականի պէս ցցուի այս քահանան՝ իր ընկերներով, իր բռունցքը պէտք է սաւառնի անոնց գլխուն վրայ Դամոկլէսի սուրին պէս: Իր թաթը պէտք է լարուած մնայ անոնց օձիքին: Որովհետեւ թոյլ, անջիղ, կրաւորական նկարագիր մը ունինք, հետեւաբար խիստ եւ անգութ կը գտնենք զինքը: Տաճարին խաչքարերը կը մաշեցնենք մեր համբոյրներով, կուրծքերնիս կը բզբտենք սուրբերուն պատկերին դիմաց, խորանէն բարձրացող մրմունջները խոր յուզումներ կ'ակօսեն մեր հոգիներուն մէջ. կը սարսուանք, կը թոթովենք, պաղատագին կը գալարուինք ա՛յդ վանկերէն, հպարտութիւն, արժանապատուութիւն. անձնական արժէք ու արժանիք բոլորը կը մերկանանք հող, ինքզինքնիս գետնամած ստրուկ ու գերի կը նկատենք, բայց երբ տաճարէն դուրս կը գլտնուինք՝ կը մոռնանք այս հզօր ներգործութիւնը, կը մոռնանք մեր ջախջախումը, հետեւաբար կը վիճինք ու կը ծառանանք՝ երբ Տ. Հմայեակներ նախանձախնդիր կ'ըլլան որ սրբազան թատերգութեան մը կեղծիքին չ'իջնեն այդ արարողութիւնները

«Ահաւասիկ կորաբամակ ձերունի մը, որ իր կեանքին մէջ երբէք գլուխ ծած չէ: Ընտանեկան կսկիծներէն պատառատուն սիրտ մը, օրն ի բուն բանասիրական պրպրտումներու եւ աշխատանքի մէջ կքած ուսեր, կէս դարէ ի վեր Աստուծոյ պաշտամունքին համար փլած ողնայար

մը, որ նետի մը պէս սլացիկ եւ անվկանդ կը մնայ իր ասպարէզին եւ հանրային կեանքի մէջ: Ահաւասիկ պարզուկ քահանայ մը, որ վեղարներ դողացուցած է ժողովներուն մէջ: Ժողովրդական առածը կ'ըսէ. խելքը տարիքին մէջ չէ, այլ գլխուն: Արժանիքը նուիրապետական կարգերուն մէջ չէ անպատճառ: Ունեցեր ենք ի՛նչ գլխու տէր քահանաներ, որոնց վտիտ ստուերին տակ փառահեղ եպիսկոպոսներ անշուք մնացեր են: Կը զմայլիմ իր նկարագրին: Ուզիդ, անսայթաք նկարագիր մը, որ ճկիլ չգիտեր, իրաւախոհութիւն չի ճանչնար, համոզումները հոչակելու մէջ բան մը պահեստի չի թողուր, ցմրուր կը քամէ իր մտածումները եւ զգացումները, ճակատէն կը զարնէ, վագրի պէս կը խուժէ, այս մաշկ ու ոսկորի աւերակոյտը կը բոցավառի. կը ճարճատի, եւ դուն՝ համամիտ ալ չըլլաս կը խանդավառիս, կը մխիթարուիս այս շքեղ ընդվզումը, այս անկեղծութիւնը, այս անվեհեր խոյանքը տեսնելով: Տարիներ առաջ, գիշեր մը. դաշնակցական բիրի հարուած մը պատուեց անոր գլուխը, արիւն պոռթկաց, վիզն ի վար հոսեցաւ, դէպի կուրծքը, իր ունեցած միակ լանջախաչն է աս:

«Ըսի թէ յամառ է իր գաղափարներուն մէջ, սրբաբրութիւն չընդունիր. Կը բաւէ որ կազմած ըլլայ համոզումը, ո՛չ մէկ նիգ, ո՛չ մէկ ուժ քայլ մը ետ չեն կրնար մղել զինքը: Յետոյ, այնքան ամուր կը կառչի որ արծիւին ճիրաններէն ճողոպրելու պէս անհնարին կը դառնայ իր թաթին տակ ինկողներուն համար՝ ազատել իրենց օձիքը: Կանոնագիրը պարեգօտին մէջն է, վայրկեանը անգամ մը դուրս կը քաշէ հրագէնի փարելու պէս, եւ յօդուած մը կը պարպէ, սիրտէն զարնելու համար ենթական: Կը զարմանամ որ իր միտքը յաճախող այնքան մտածումներուն մէջ՝ որոնք մտասեւեռումներ եղած են այլեւս, ինչպէ՞ս ճամբայ կը գտնեն իր բանասիրական հետազօտութիւնները, առանց խառնուելու անոնց եւ առանց շնչահեղծ ըլլալու անոնց մէջ, եւ որչա՛փ դժուարութիւն կը կրէ արդեօք՝

այդ ներդաշնակութիւնը եւ կարգապահութիւնը ապահովե-
լու համար, այն սալօններուն պէս ուր ֆանֆառը նուազած
պահուն յանկարծ դուրս կը սկսին՝ ընթա-
նալ, պահելով իրենց տիրապետութիւնը:

* * *

1933 Դեկտ. 2 Թուականու, «Ժամանակ»ի մէջ ահա
թիւ ի՞նչ գրած ենք Էքսէրճեան քահանային լանջախաչի
տուուչութեան ատթիւ, — «ԱՐԺԱՆԱՒՈՐ ՎԱՐՁԱՍՏՐՈՒԹԵԱՆ
Մ'ԱՌԹԻՒ» խորագրով. —

«Գերագոյն ու հոգեպարար յուզում մը համակեց մեր
սիրտը, երբ լսեցինք որ բարեպաշտ մէկը, Հայ. Առաք.
Ս. Եկեղեցւոյ մէկ հարազատ զաւակը, իր տաներէցին դի-
մած ու տրամադրած է ականակուռ լանջախաչ մը՝ յանձ-
նուելու համար Արժ. Տ. Հմայեակ Ա. Բհնյ Էքսէրճեանի,
պայման դնելով որ ոչ իսկ նոյն խաչով իր յոգնաբեկ
կուրծքը զարդարող Տ. Հմայեակն ալ իմանայ նուիրատուին
ինքնութիւնը:

«Երբ յաջորդաբար հրապարակ նետուած գայթակղա-
կան ամենացաւազին խնդիրներ կը սպառնան Հայուն դա-
րաւոր հաւատքին՝ հանդէպ իր Եկեղեցիին, սփոփարար
յարգանքին՝ հանդէպ հայ Եկեղեցական սքեմին, խորին յա-
փշտակութեամբ մը կ'ուզենք խոնարհիլ հոգեկան այն ան-
սասան կառուցումին, զոր տասն եւ ութ դարերու երկար
շարքին մէջ կոթողեր է հայ ժողովուրդին էութեան մէջ
Հայ. Առաք. Ս. Եկեղեցին, իր արժանաւոր ու նուիրեալ
Եկեղեցականներուն պանծալի շքախումբովը:

«Այս առաւօտ Սկիւտարի Ս. Խաչ Եկեղեցւոյն մէջ
Արժ. Տ. Թովմա Ա. Բհնյ. Շիկահեր հանդիսաւորապէս կը
կարդայ հայրապետական օրհնածիր կոնդակը եւ կը զար-
դարէ՝ ի դիմաց Կրօն. Պատկ. Ժողովոյ՝ այս վաստակաւոր,

կորովի, անաչառ, խստակրօն եւ բարեպաշտօն քահանայ
հօր կուրծքը:

«Հայ Եկեղեցականի մը վարձատրութեան դէպքը ո՛չ
առաջինն է եւ ո՛չ ալ անշուշտ վերջինը:

«Եւ սակայն Սկիւտարի այս քահանային վարձատրու-
թեան մէջ կը նշմարենք ուշազրաւ երկու պարագաներ,
որոնց վրայ կ'ուզենք ծանրանալ եւ հասարակութեան ալ
ուշադրութիւնը հրաւիրել:

«Էանջախաչը պատրաստող եւ իր անունը հանրութենէն
եւ նոյնիսկ նուէրընկալէն ծածկել ուզող անծանօթ պատուա-
կան հայորդիին այս գեղեցիկ ժէսթը շատաջուն ապտակ մըն
է երեսին այն Եկեղեցականներու, որոնք իրենց սքեմը՝ փո
խանակ Հայ Եկեղեցիի զաւակներուն ՍԻՐՏերուն խանձա-
րուր եւ վարչամակ ընծայելու՝ կիրքերու, շահատակու-
թիւններու՝ ընչաքաղցութեան եւ պայուսակ ընդ անութ
շուկայիկ շահադիտութեան մթին ու անպարարական վա-
րագոյրի են վերածած:

«Էքսէրճեան քահանային լանջախաչը՝ մարգարտայեռ,
ադամանդակուռ, ոսկեծոյլ եւ զոհարազարդ պատուանշան-
ներէն շատ աւելի թանկ կ'արժէ՝ ո՛չ թէ միայն իրեն՝ այլ
ամբողջ զգացում ունեցող ու դատել գիտցող հայերուն
համար

«Այդ Խաչը ծուլուած է ՍԻՐՏ է...: Հայուն ՍԻՐՏն է
այն, ԵՐԱՆՏԻՔն է այն, ԴԱՏԱՍՏԱՆն է այն, ՎՃԻՌն է
այն...:

«Կոչումն ու Եկեղեցւոյ շահը նիւթին հպատակեցնել
գիտցող Եկեղեցական մը, խուցի մը խեղճութեան մէջ տա-
ռապող այլ սակայն ո՛չ իսկ օր մը դրամի ծուխի մասին,
իր անձնական հաշուոյն, բերնէն բառ մը հանող Տ. Հմայ-
եակ մը, շահադիտութեան մարզին մէջ իր պետն իսկ ամ-
բաստանելու չվարանող արիասիրտ ժողովական մը ահա
կը վարձատրուի երկու ուղղութեամբ, Եկեղեցւոյ գերագոյն
ՊԵՏէն շքանշան կախելու արտօնութեամբը եւ ԺՈՂՈՎՈՒՐ-

Դէն նոյն այդ լանջախաչը հայուն ՍԻՐՏէն կերտելով իրեն մատուցանելուն անձնագործունակութեամբը:

Պօլսահայը շատ լաւ կը ճանչնայ այս եկեղեցական ուշագրաւ դէմքը. աւելորդ չըլլար սակայն իր համառօտ կենսագրական զիծերը ներկայացնել մեր ընթերցողներուն:

«Տ. Հմայեակ Խաչակիր Ա. Քհնյ. էքսէրճեան բնիկ պօլսեցի է եւ ծնած է 1861ին: Երիտասարդական հասակէն իսկ մասնաւոր հակում մը ունեցած է դէպ ի մտաւորականութիւն եւ վաղամեռիկ Պետրոս Դուրեանի կենսագրութիւնը պատրաստած է տքնաջան աշխատութեամբ շատ երիտասարդ տարիքի մէջ. Տ. Հմայեակ Ա. Քհնյ. յամառ ու անխոնջ բանասէր մըն է. իր տառապած ուղեղը այսօր իսկ հակոտնեայ հակադրութիւնն է իր ազգուն մարմնոյն եւ պահած է կատարելապէս իր մտքի պայծառութիւնը:

«Ընդհ. Ժողովի մէջ արժեցուցած է միշտ իր ներկայութիւնը՝ իր խոր հմտութիւնովը ո՛չ թէ միայն Պատրիարքարանի կանոններուն եւ օրէնքներուն, այլ նաեւ ժամանակակից անցքերուն եւ դէպքերուն:

«Քահանայ ձեռնադրուած է 1893 Յուլիս 11ին Հոգելոյս Գրիգորիս Եպս, Ալէաթճեանէ եւ ճիշդ քառասուն տարիներէ ի վեր կը ծառայէ եկեղեցիին, առանց ո եւ է բիծ կամ արատ բերած ըլլալու իր քահանայական կոչումին: Բազմիցս մասնակցած է Կրօն. Ժողովներու եւ զիտցած է արժեցնել իր ներկայութիւնն ու ձայնը: Երկայիս Կրօն. Ժողովին Բ. Ատենապետն է եւ՝ հակառակ իր հիւանդազին վիճակին՝ միշտ պատնէշին վրայ է:

«Երկար ու բարեբաստիկ կեանք կը մղոթենք իրեն.

«Բոլոր սրտով կը շնորհաւորենք զինքը Հայրապետական արդար այս վարձատրութեան եւ ներկայ առիթով Ժողովողային ինքնաբուղիս յարգանաց ալ արժանի հանդիսացած ըլլալուն համար:

«Հայ. եկեղեցւոյ զաւակներուն ՍԻՐՏէն կերտուած այդ լանջախաչը թող դաս մը ըլլայ ամէն անոնց, որոնք սքեմ ունին եւ, աղէ՛, չեն գիտեր թէ ի՞նչ ունին»:

* * *

1933 Դեկտ. 19ին Ազգարարի մէջ Parisien ստորագրութեամբ Երուանդ Տէր Անդրէասեան Բարիզէն կը գրէ հետեւեալը:

«Հմայեակ քհնյ. իսկապէս նկարագրով յամառ, աննեւրոյ, դէգ, ինքնաբաւ ուսումով եւ հմտութեամբ, անխոնջ ընթերցող եւ անձանձիւր գրող Կրօնաւոր Հորոյ մը, թէեւ աշխարհականը յիքս կրօնի եւ աւանդութիւններու անհաշտ էր կրօնաւորին հետ: Բայց երկուքը զուգահեռական բարքի խստութեամբ: Հմայեակ քհնյ. — եթէ հարկ իսկ ըլլայ — պատրաստ է զոհուելու, քարկոծուելու իր գաղափարներուն համար: Քոմիւտի ճամբայ չունի, ճակատ է իրեն համար ամէն կողմ: Սակաւ են այսպիսի տիպարներ. Նոյն իսկ, ի հարկին, յամառութեան դաս կուտար Յովակիմեան Ա.ին, որ ծնեալ յամառութիւնն իսկ է: Աներեք ու անխլիրդ այս բարեխառնութեան մէջ բարեբախտաբար արմատացած չարութիւն չկայ, ինչպէս նաեւ խորացած դառնութիւն: Ու երբ կ'երկարեմ նկարագրի այս կառոյցքին վրայ, պատճառը ա՛յն է որ Հմայեակ քհնյ. տիպար մըն է այս դասակարգի մարդոց, որոնք ընկերութեան համար անխուսափելի պէտք մըն են, շէնքը ամուր բոնելու համար:

* * *

1933 Դեկտ. 21ին դարձեալ Parisien ստորագրութեամբ Երուանդ Տէր Անդրէասեան «Մարդկային Ժայռեր» վերնաթերին տակ կը գրէր հետեւեալ տողերը:

«Ներեցէք որ այսպէս անուանեմ կեանքին զանազան փորձութիւններուն դիմադրող այն հուժկու եւ տոկուն անձերը, որոնք Ժայռի պէս ամուր կը կանգնին իրենց ճակատագրին գծած անորոշ սահմանին մէջ: Եւ ի՞նչ զարմա-

նալի հակասութիւն: Այս տեսակ մարդկային ժայտեր — նոյնանան հողազանգուածներուն եւ հաստաբեստ գուղօձերուն, բուղօձերուն պէս, — կը կրեն շարունակ բազմապիսի հարուածներ, ինչպէս միւսները երկինքին անձրեւն ու ձիւնը, սառն ու բուքը, առանց խանգարելու իրենց ցայտուն վէժքը, կարկառուն ելքը դէպի այերք:

«Այս տեսակ ժայտ մըն է Հմայեակ Քահանայ Էքսէրճեան, վտիտ, ըստ երեւոյթին վատոյժ, այլ նկարագրով ու խղճմտանքով ուժեղ, երկարածիգ, ամբարձածիգ տեսակ մը տիգաբուն, որ ահա վաթսուն եւ աւելի տարիներէ ի վեր իր ու մեր շրջանակին մէջ անուն ունի, սկսեալ իր աշակերտի ուշիմ ու վաղահաս համբաւէն մինչեւ հո՛ն, Ակիւտարի Ս. Խաչը, ուր կը կանչէ կ'որոտայ այդ Ստենտորը արծուադէմ քնթոնոցով մը, եթէ ներելի է այս բացատրութիւնը:

«Հագիւ պատանի, բայց ծանօթ էր մեզի արդէն իսկ Բարսեղ Էքսէրճեանի անունը: Ու այդ անունը աներկիւղ յամատուժեամբ տոկաց բաւեց ցարդ, ամէն ճամբաներու վրայ: Գրական, ազգային, խորհրդարանական, կրօնական, վիճաբանական բոլոր արահետներու վրայ այդ անունը իր զիծը կը տարածէ: Պատիւ իրեն:

«Բայց ինք բնաւ «պատիւ»ի, արտաքին պատիւի հոգը չունէր, անոր համար պատիւը իր պարտականութիւններուն կատարման զիտակցութիւնն է: Չէր սպասեր զնահատանքի, մինչեւ որ իր գերադասները, անոր արժանաւոր ծառայութիւններուն հարկին տակ ընկճուած, անոր յոգնած ու սպառած լանջքէն կախեցին խաչը, զոր հէք պատուական երէցը կը կրէ արդէն երկար տարիներէ ի վեր, շնորհուած լանջախաչին տառապանքը, անոր անուրին տագնապը: Բայց համբերեց տառապանքին ու տազնապին, որովհետեւ նուիրուած էր իր համայնքին, եւ իր ընտանեկան ծանրածանր վիշտերը չէին կրնար թմրեցնել պարտականութեան բուն զգացումը, որուն նուիրուած մըն էր:

Ի՛նչ ձիւներ որ եկան գլխուն, կրեց, հանդուրժեց, արտակարգ համակերպութեամբ, զոր կ'արժէ անուանել ինքնաշնորհ, մին այն եօթնարիի շնորհներէն, զոր Ս. Հոգին կը ցօղէ իր ընտրածներուն վրայ — կ'ըսէ Ս. Գիրքը:

«Այս ամէնը հիշող մէկ քառորդ ժամուան մէջ խորհեցայ անարժանս՝ լանջախաչերու արժանաւոր եւ զինքը մանաւանդ մօտէն ճանչցողներու համար գերընտիր հոգեւորականին պատկերը վերակոչելով այնքան հեռուէն...:

* * *

Ս.

1934 Յուլիս 8 և 9 յաջորդական թիւերով Աշոտ Քէչեան Տ. Հմայեակի նկարագրի մասին հետեւեալ տողերը կը գրէ Ազդարարի մէջ, «Երդիծական Ուրուագիծեր» խորագրին տակ:

«Հին Կտակարանին մէջ, Եհովան սարսափելի է: Անհնազանդ ժողովուրդը պատժեց, պատուհասեց, մարախ տեղացուց, ժանտախտ սփռեց, հուրի մատնեց: Նոր Կտակարանին մէջ՝ Գերագոյն Բարութիւնն է: Էքսէրճեան Հայր, հաւասարապէս սնած ու զարգացած է այս երկու մթնոլորտներուն մէջ: Հանրային կեանքին մէջ երեւան կուգայ՝ Հին Կտակարանին վրայ սրուած շեղքը իր լեզուին, ինչպէս դանակ մը յեսանաբարին վրայ, իսկ անհատական կեանքին մէջ՝ հոգեգալուստին լեզուն է: Ժողովներուն մէջ՝ Հին Կտակարանին կը պատկանի, Նոր Կտակարանէն ալ օգտուելով՝ Տաճարը մաքրագործելու նման փաստերէն: Ընկերային կեանքին մէջ՝ ուղղակի սերած է Նոր Կտակարանէն. մինչեւ ճգնազգեացի մը կատարելութեան հասնելով:

Ս.մէն անգամ որ ժողովին մէջ կը լսեմ սոսկալի որոտը իր հարցումներուն, իր հարցապնդումներուն, կարծես մանկութեան ընթերցումներուս մէջէն Եհովային ձայնն է

որ կը լսեմ անեղազոտ, երբ հուր ու ժանտախտ եւ մարախ կը տեղացնէր՝ մանանայի տեղ...:

«Եկեղեցականներ կան, որ իրենց քարոզներուն մէջ «Աւետարանի՛ ճամբան» կը յեղյեղեն շարունակ, մինչդեռ իրենք այդ ճամբէն բաժնուած, ուրիշ ճամբով կը շարունակեն իրենց կեանքի ուղեւորութիւնը: Իրենց բերնին մէջ պայմանադրական յանկերգ մըն է «Աւետարանի ճամբան», ինչպէս մանկապարտէզի երախայ մը որ անգլիերէն ոտանաւոր կ'արտասանէ, առանց մէկ բառին իմաստը գիտնալու:

«Ո՞րն է Տ. Հմայեակ Հօր ընտրած ուղեգիծը ուրեմն: Վստահաբար՝ Աւետարանի՛ ճամբան, պիտի ըսէք: Աւելի ճիշդը՝ այն անկիւնադարձը, ուր Աւետարանին եւ Հին Կտակարանին գիծերը իրար կը զուգահիւսին, միացած յառաջանալու համար: Իրեն յատուկ, իրեն սեփական ճամբայ մը, ուրկէ, գլուխը ճօճելով, անայլայլ ու շիտակ կ'երթայ, ստանց անգամ մը ետին դառնալու, երբ դառնութեան, գնահատութեան, բողոքի կամ ծափերու աղմուկ մը կը բարձրանայ իր քայլափոխին:

«Իր գաղափարներուն ու տեսակէտներուն մէջ ինք առանձինն աշխարհ մըն է, սահմանազուխները ամուր մը փակած...: Այդ սահմանէն ներս թողունք հակակշռի կամ հոգատարութեան պէս ո եւ է ոտնձգութեան չհանդուրժելը, զոնէ հասկացողութեան մը գալու համար գետին մըն ալ չի տրամադրեր...: Իր համոզումներուն մէջ բացարձակ ինքնակա՛լ, փոյթը չէ թէ իր պնդումներով որո՞ւն համոզումներուն դէմ ծառացած կ'ըլլայ, նուիրապետական ի՞նչ կարգի վրայ գտնուողի մը: Թ՛զուկ հոգիները անպատկառութիւն պիտի նկատէին այս իսկապէս կարգապահական կեցուածքը: Ժողովական քահանան բարձրաստիճան կղերին հանդէպ՝ միշտ բուրվառը ձեռքին եւ կամ միշտ բուրվառը շրթունքէն առկախ պիտի ուզէին տեսնել: Մինչդեռ, ժողովական էքսէրճեան Հօր այդ ձեռքէն ցուցամատ մը կը

ժայթքի, զամուռելու համար անոնց աչքին մէջ: Էքսէրճեան Հայր գիտէ զանազանել իր պարտականութիւնները, ժողովին մէջ թէ Տանարին, գիտէ հետեւաբար, հատուցանել իր երկու տուրքն ալ: Ժողովասրահի մը սեմին առջեւ կանգ կ'առնեն նուիրապետական ամէն աստիճան ու պատուանդան: Ներսը՝ մէկ տարագ կայ, հաւասար անդամակցութիւն, ինչպէս ընկերային բոլոր կարգերը կը մերկանան... բլաժին թէ՛ բաղնիքին մէջ:

«Այս է պատճառը որ իր անդամակցած Կրօն. Ժողովը արմատական եւ անողոք եղաւ. եւ իր այս խոյանքովը անակնկալի բերաւ ու հետեւաբար վրդովեց գաղջ որոշումներու բարեխառնութեան վարժուած ըմբռնումները, որ Կրօն. Ժողով մը Պրոպատիկէ աւագանի հետ կը շփոթէին:

«Եթէ, լոկ օրուա՛ն մը համար, Կրօն. Իշխանութիւնը իրեն յանձնուի, զրեթէ ամէն եկեղեցի նոր քահանայական ձեռնադրութիւններ կատարելու պիտի պատրաստուի. իսկ քարոզիչ պիտի չունենանք կարծեմ...: Ռէթէոս Պէրպէրեանի տնօրէնութեան օրով, ուսուցիչ Աւետիս Առանձար, հեղինակութիւն մը՝ աշխարհագրութեան ու պատմութեան հիւղերուն մէջ, օր մը կրտսեր դասարանի աշակերտներուն կը սպառնար. «Օր մը միայն, Պէրպէրեան էֆ. Թող ինձի յանձնէ վարժարանին տնօրէնութիւնը, ես գիտեմ ընելիքս...»: — «Գիտեմ ձեր ընելիքը, պատասխանեց դասարանին ամէնէն պատրաստաբան աշակերտներէն մին, ամէնքս ալ վարժարանէն կ'արտաքսէք...»:

«Տ. Հմայեակ Հայր եթէ դատաւոր ըլլար, վստահ եմ որ Եղեռնադատ Ատեանը պիտի նախընտրէր. եւ մահապատիժներուն մէջ՝ ելեկտրահարութիւնը. ., կամ Ատեան մը պէտք էր կազմել, իրեն յատուկ օրէնսդրութեամբ, ամենաթեթեւ յանցանքին ամենաձանր պատիժը, համաձայն իր սկզբունքին, ո եւ է գայթակղութիւն գործող մը չարաչար պատուհասելով, որպէս զի գայթակղութեան թեկ-

նածունեքը դարձի գան, ինչպէս չեմ յիշեր ո՛ր երկրին մէջ, գողութիւն գործողին ձեռքը կը կտրեն:

«Եկեղեցական բարոյականին ու կարգապահութեան հանդէպ մեր նախանձախնդրութենէն հետզհետէ այնքան ընկրկեր ենք, տեսնելով անկումները, եւ այս վիճակին այնքան համակերպեր հաշտուեր ենք որ, էքսէրճեան Հայր մը երբ պատիժի ու ահաբեկումի կը դիմէ՝ եկեղեցակա- նութեան վարկը կանգուն բռնելու համար, ահաւասիկ Դա- մոկլէսի սուր կը նկատենք զայն, եւ նոյն իսկ... դահիճ:

«Տեսա՞՞ծ էք հին տուն մը՝ մէկ կողմին վրայ կքած: Տանը ճակատին վրայ ձեւակեղծումը սկսած է արդէն, բայց ջա- մուր գերաններ չուժով մը կտրեցի, կանգուն կը բռնեն տունը: Էքսէրճեան Հայր մէկն է այն խապահով յեմակնե- րէն, որոնք եկեղեցականութեան մակարդակը կը փրկեն քայքայումէ:

«Ժողովին մէջ, իրեն խօսք տրուած ժամանակ, այ- սինքն յարձակողականի արտօնութիւն առած ժամանակ, երբ ուրուականի մը պէս կը բարձրանայ, կը զարմանաս որ այս դողոջուն կորաքամակ ձերունին ինչպէ՞ս նիզակի մը նման յանկարծ կը շտկուի, կ'ուղղուի: Թող փոթորիկ- ներ գոռան շուրջը, թող խօսքը խափանել աշխատին. ա- նօգուտ: Կը շարունակէ ու կ'աւարտէ ըսելիքը, այսինքն կը վերջացնէ ենթակային գործը. մորթը միայն ձգելով...: Ներեցէ՛ք, խիստ բացատրութիւն մը սպրդեցաւ: խօսքը խափանել ըսի, մինչդեռ իր խօսքը չի կրնար խափանուիլ, իր անդնդախոր ձայնը՝ որ միսմիսակր կը բաւէ Կեղրոնա- կան Երզնաստուբնի պասօի բաժնին, կը տիրապետէ՝ դարձ- եալ, եթէ ամբողջ ժողովն ալ հաւաքաբար իր կոկորդին համազարկը բանայ էքսէրճեան Հօր դէմ...: Աքձանի պէս կը կառչի կը մնայ. կրնայ ժողովը ընթացք չտալ իր պա- հանջումին, ինք չի յուսահատիր սակայն, ընդհակառակն աւելի կը խստացնէ իր պահանջումները, որոշուած պայ- մանաժամին չյանձնուող փախստական յանցաւորներու

պատիժին պէս. ո՛վ որ է ենթական, ա՛լ անոր դէմ նուիրա- կան պատերազմ հուշակած է. այս նիստին չեղա՞ւ, յաջոր- դին, յառաջիկային. վերջապէս կ'ընէ չըներ, խօսքը անոր վրայ կը բերէ. եթէ խօսելու կարելիութիւն չկայ, գրաւոր կը ներկայացնէ, դուռնէն չեղա՞ւ՝ պատուհանէն կը մտնայ, եւ գոնէ... ատենագրութեան մէջ անցնել կուտայ: Իր խօս- քը խափանել աշխատողները երբ գոհունակ շունչ մը կ'առնեն, ինք ուրախ է արդէն, իր յարուցած խնդիրը պատմութեան մէջ յաւերժացնել յաջողած ըլլալուն հա- մար...:

Բ.

«Ֆիզիքականը քամուած ու ցամքած, հոգին վիշտերէ քանդուած, բայց պատնէշին վրայ է. իր ձայնը բարձր կը հնչէ, ո՛չ միայն իր առողջ թոքերուն եւ նիքթիստով ու քաֆէլինով արօս եղած ձայնական լարերուն շնորհիւ, այլ իր անխոցելի ըլլալուն ազատութեամբը, եւ իր անխախ- տելի տրամաբանութեամբը:

«Իզմիրլեան Ս ի անդամակցած Կրօն. ժողովի մէկ նիստին, գայթակղութիւն մը դատելու առթիւ, երբ Նա- խագահ Ս.ը, ժողովականներուն տրամադրութեան մէջ ողորմւմ մը յառաջ բերելու նպատակով, կը հարցնէ «Ո՛վ որ մեր մէջ անմեղ է, ան թող նետէ առաջին քարը», Իզմիրլեան Ս. ոտքի կը խոյանայ եւ «Ե՛ս Սրբա- գան» կը պատասխանէ: Էքսէրճեան Հայր պիտի երկ- րորդէր անմիջապէս, երբ այդ ժողովին մասնակցած ըլլար:

«Պահպանողական- ձախակողմեան է, եթէ խորհրդա- րանական չըլլայ ալ այս բացատրութիւնը: Զինքը լռեցնե- լու համար զիշեր մը, ճամբուն վրայ. բիրի հարուած մը իջաւ զլիսուն, մեղքեց ճակատը: Տակաւին դարմանումի մէջ, յաջորդ նիստին դարձեալ պատնէշին վրայ էր, վի-

րակապով գլուխը փակած, իսկ կապարի պէս ծանր՝ այս արագահարուած լեզուն դարձեալ արձակուած...:

«Փողովներու մէջ վիճարանութեանց ընթացքին, հակառակորդը ջախջախելու համար, երբ յանկարծ ձեռքը՛ գրպանը կը տանի. «բացուեցէ՛ք» սպառնալու ձեռով, կը սարսափիս որ հիմա՛ ատրճանակ պիտի հանէ. մինչդեռ պլորուած տետրակ մըն է դուրս քաշածը. կանոնագրի՛ րը: Ամէն նիստի, յաճախ այս սրտադողին կը մատնէ ժողովականները...:

«Աւուսցուցութեան բեմէն դէպի քահանայական փիլոն իր փոխադրութեամբ, Ալէքսանտրեան եւ Իգմիրլեան Ս.ներու նկարագրի կռանին վրայ դարբնուեցաւ այս հոգեւորականը, անոնց խրոխտ արժանապատուութեան երկաթեայ ջիղը իր ողնայարն ի վեր պրկուեցաւ: Կեանքին մէջ միայն խորանին առջեւ ու սրբութեանց առջեւ ծոցաւ. հիմակ ալ օրն ի բուն ծուարած է գրասեղանին առջեւ, գիշերներն ալ կանթեղի մը խարխափող լոյսին տակ. աչքին լոյսը կը քամէ լեռնակուտակ դէզեր պրպտելով, անդադար գրել աշխատելով: Մովսէս Խորենացին Ե. դարու բնիկ ցոյց տալու փաստեր հայթայթելու համար, որպէս զի Դրդ, Տրդ դար տեղահան չընեն: Իր այս բանասիրական խոր թարթափումներուն մէջ, կը զարմանաս թէ ինչպէ՞ս միջոց կը գտնէ .. Թօքաթլեանի պայմանագրութեան պէս հաշիւներ հանելու կամ հետեւցնելու, մանաւանդ առանց փաստաթուղթի:

«Փամանակին, Պետրոս Գուրեանի կեանքն ու գործը ներկայացուցած է տաք ու բարախուն հատորով մը, ուր մեր պատանեկութեան արցունքները հոսեցան:

«Ճարտար գրիչ ունեցած է, բանասէր, քննադատ, եւ եռանդաբորբ տարիքին՝ բանաստեղծական թոխքներ ալ, որ անպատճառ օդին ու ջուրին կը պարտինք, այդքան քնքշութիւն՝ այնքան... կարծր ձեռքի մը մէջ անհաւատալի թուելով հանդերձ: Հայ երէցներու նահապետին՝ Հոգելոյս

՝ բունի Հօր կիսանդրին կանգնած է պատմութեան մէջ, մատենիկ մը՝ ուր իր գրական ճաշակը կը յայտնուէր հանուխէն:

«Նոր Կտակարանին տ-սոին ու ոգիին իր հաւատարմութեան փաստերը շատ են. Իր ընտանեկան, անհատական կեանքը պատի՛կ Գողգոթայ մըն է: Կէս դարէ ի վեր իր նուիրումը Աղքատախնամ գործին, ամէնուն օգտակար ըլլալու իր բարեյօժարութիւնը... «Աւետարանի ճամբէն» քալող ուղեւորը չե՞ն յայտներ: Միայն, կը խորհիս թէ ժողովասրահ մտած ժամանակ, արդեօք իր այսքան բուխ սիրտը հովանոցին հետ դո՞ւրսը կը կախէ, եւ կամ իր խո՞ւցը կը թողու, սուրճի ճէզվէին քով, իսկ ամէն պարագայի մէջ հետը առած ժողովի չի մտներ...:


«Մովսէս Խորենացիէն զատ բան մը չերեւար իր աչքին. ոչ իսկ օրուան հացը: Մարդիկ կան որոնց իտէալն է՝ վիճակահանութեան մեծ պարգեւը շահիլ, արարթմաններու տէր ըլլալ, Քառուգօ մը ըլլալ, թաղական ըլլալ, մեծահարուստ աղջկան մը սիրտը գրաւել, պաքաւորիայի քննութեան մէջ յաջողիլ, առանց բացի կըթական պիւտճէ ունենալ, եւ բոլոր այս կարգի ընթացիկ երազներ: Էքսէրճեան Հօր մեծագոյն իտէալն է Մովսէս Խորենացին Ե. դար փոխադրող փաստաթուղթ մը ձեռք բերել: Եթէ կ'ուզէք այս բազմարդին Հայրը երջանկացնել, թուղթ մը գտէք բերէք իրեն, ուր Մովսէս Խորենացիին անունը յիշուած ըլլայ...: Եթէ Խորենացին գիտնար որ դարեր վեջը արդէն տառապած քահանայ հայր մը իրեն համար այսչափ պիտի չարչարուի, ինչ կ'ընէր չէր ըներ, կա՛մ այդ հոյակապ պատմութիւնը չէր գրեր, կա՛մ... Ե. դարուն կը ծնէր...:

«Այսօր չէ միայն որ խղճի պարտք նկատած է հետաքրքրուիլ կարգալուծութեան ու պարսաւանքի հետ ո եւ է առնչութիւն չունեցող խնդիրներով: Օրինակի համար, տարիներ առաջ, տէրտ ըրած էր թէ Յովհաննէս Մկրտիչին կերածը մարա՞խ էր թէ մարուխ եւ այս առթիւ գրքոյկ մը

հրատարակած է: Մարախ թէ մարուխ կերած ըլլալը ի՞նչ արժէք ունի սակայն մեր նախահօր կերած ապուրին քով, որուն ծանր հետեւանքները կը կրենք մինչեւ այսօր, իսկ Յովհաննէս Մկրտիչ մարախ կամ մարուխ ուտելով շատ շատ ստամոքսի խանգարում մը ունեցած պիտի ըլլայ...: Յետոյ, Մովսէս Խորենացիին հինգերորդ թէ եօթներորդ դարու ծնունդ ըլլալը իր ի՞նչ փոյթը, երբ այդ մասին իրմէ զատ հոգ ընող մը չկայ ազգին մէջ...: Կր տեսնէ՞ որեմն որ... մատաղօրհնութեան յոբելեանի մը չափ ալ շահեկանութիւն չունի, զոնէ վրան յիշատակարան մը գրելու համար:

«Կը խորհիմ որ, ապագային օրինակի համար ՉՂրդ դարուն, Մովսէս Խորենացիին նման կոռուխնձոյ մըն ալ Տիար Գասպար Նեմցէն պիտի ըլլայ: Պատմաբանները խնդիր պիտի ընեն, պիտի չկրնան համաձայնիլ թէ Տիար Նեմցէ ո՞ր դարուն ծնած է, եւ հետեւաբար ո՞ր դարուն գրած է իր աշխարհաբարը. եօթներորդ, տասներեօթերորդ թէ տասնորիններորդ դարուն...: Եւ, ապահովաբար Սողոմոնի վճիռին պիտի դիմեն, երկուքի բաժնելով Գասպար Նեմցէն, գլխուն կողմը եօթերորդ դարուն եւ ոտքին կողմը 17րդ. դարուն յանձնելով...:

Ի՞նչ աղէկ պիտի ըլլար, եթէ Տ. Հմայեակ Հայր փոխանակ ձգելու որ ՉՂրդ դարուն բանասէրները մոռնաւ տանին Պ Նեմցէի լեզուն, ինք հիմակուրնէ լուծէ ապագային համար կարելոք այս խնդիրը. եւ ճշդէ թէ Պ. Գասպար Նեմցէ. . ո՞ր դարուն մէջ կրնայ ապրած ըլլալ եւ հետեւաբար ո՞ր թուականին կրնայ գրած ըլլալ իր աշխարհաբարը. վերոյիշեալ ո՞ր դարուն մէջ: Ապագայ լեզուաբանները բաւական կենոտս հանգոյցէ մը ազատած պիտի ըլլայ էքսէրնեան Հայր, որ իբրեւ ժամանակակից ու ականատես Պ. Նեմցէի, անշուշտ իր վկայութեանը դէմ առարկութիւն մը պիտի չունենայ պատմութեան կողմէ...:



ԱՐԺ. Տ. ՀՄԱՅԵԱԿ ԽԱԶԱԿԻՐ
Ա. ՔԶՆՅ. ԷՔՍԷՐՃԵԱՆ

1934 Սեպտ. 20ին Պարոյր Քէչեան «Նոր Լոյս»ի մէջ կը գրէ Քառասնամեակ մը վերնագրին տակ հետեւեայ տողերը:

Կրօնական ժողովի անդամներուն մէջ փափաք յայտնուեր է որ տօնախմբուի քահանայական քառասնամեակը Ատենապետ Տ. Հմայեակ Ա. քհնյ.ի, որ կը վարէ Սկիւտարի Ս. Խաչ եկեղեցիին աւագերէցի պաշտօնը:

«Ո՛րք որ պիտի զարմանայ լուրին համար. ընդհակառակն, պէտք է ցաւիլ որ ասկէ առաջ առիթ մը չներկայացաւ յարգանքի հրապարակային ցոյց մը ընելու եկեղեցական դասակարգի այս յոյժ արժանաւոր ներկայացուցիչին, որ այնքան բարձր պահած է հոգեւորականութեան պատիւը իր անաչառ, անկաշառ, անկողմնակալ, անշահախնդիր պաշտօնավարութեամբ. ինչպէս անկէ առաջ պատուաւորապէս վարեր էր ուսուցչական պաշտօնները, դպրոցական գրասեղաններուն հրաժեշտ տալէ ետքը: Եթէ կը պահանջենք որ պատժուին իրենց նուիրական պաշտօնին մէջ թերացող անոր սրբութեանը դէմ դաւաճանող անարժանները եւ անուպաները, ապա ուրեմն պէտք է արժանաւոր յարգանքը ընծայել եւ երախտագիտութիւն յայտնել անոնց, որ անթերի ծառայած են իրենց ազգին իբր հոգեւորական, մտաւորական եւ դաստիարակիչ, վերջապէս իբր հանրային գործիչ, յանախ իրենց անձնական շահը ոտնակոխ ընելով եւ հանգիստը զոհելով:

Տ. Հմայեակ այսպիսի տիպար մըն է եւ կատարելապէս արժանի է իրեն ընծայուելիք պատիւին, լանջախաչի յետամնաց պատիւէն ետքը:

Բայց պարագայ մը կայ այս պատուական անձնաւորութեան կեանքին մէջ, որ արժանի է ի վեր հանելու: Սկիւտարի հարագատ զաւակ, այդ միջավայրին մէջ սնած

ու մեծցած, հոն ուսած, ձեմարանին մէջ Դուրեանի եւ Պէրպէրեան վարժարանին աշակերտած, ուստի դասական ոգիով կրթուած եւ հրահանգուած, ա՛ն է որ ամէնէն առաջ գաղափարը յղացաւ նանչցնելու Պետրոս Դուրեանի կեանքը եւ տալու անոր լուսանկարը... յոչնչէ: Արդարեւ, երկար աշխատանք եղած է ասիկա: Պետրոս Դուրեանի լուսանկարը չկար, ապագայ քահանան կը հարկադրուի հետն առնել լուսանկարիչ մը եւ Դուրեան ընտանիքի անդամներու եւ մտերիմներու ցուցումներուն վրայ ապակիի վրայ առնել տալ դիմագործի այլ եւ այլ մասերը զանազան անձերու, որ ամէնէն աւելի նմանութիւն կը ներկայացնէին «Սկիւտարի Սոխակ»ին դիմագործներուն հետ, յետոյ այդ զանազան մասերը կը համադրուին, նկար մը կը պատրաստուի, որ կը ներկայացուի վաղամեռիկ բանաստեղծին տարաբախտ մայրիկին եւ անիկա չի կրնար զսպել յուզումը ի տես անակնկալին, գոչելով. «Պետրոսիկս է...»: Բանաստեղծին անդրանիկ կենսագիրը եղեր էր, կ'ըլլայ նաեւ անոր. . յետ մահու լուսանկարիչը.

«Անշուշտ իր գործը Դուրեանի մասին, կարելի չէ բաղդատութեան դնել Արշակ Զօպանեանի բազմակողմանի եւ խղճամիտ ուսումնասիրութեան հետ: Բայց իբր անդրանիկ գործ մը վաղամեռիկ բանաստեղծին կեանքը եւ անոր անմիջական շրջապատը ներկայացնող հաւատարմօրէն, պատիւ կը բերէ հեղինակին որ վերջին հազուադէպ ներկայացուցիչներէն է կէս դար առաջուան խանդավառ, զբասէր սերունդին, ձեմարանի սերունդին, որ պատուական գործիչներ տուաւ. ազգին ու երկրին օգտակար հանդիսանալու ոգիով սնած անձեր, երկու սեռէն ալ: Սիպիլ, զոր վերջերս կորուսինք, Արթիւր Մաղաքեան, եղիշէ Դուրեան. որ ապա պաշտուած մեծ ուսուցիչը եղաւ նոյն կըրթարանին, կը պատկանէին ա՛յդ սերունդին:

«Տ. Հմայեակ հանգիստի միջոց մը չնկատեց քահանայութիւնը, լոկ ծիսակատարութեան մէջ չսահմանափակ-

ուեցաւ: Մասնակցեցաւ ժողովներու եւ միշտ լսելի ըրաւ իր պատկանելի ձայնը: Ընդհ. ժողովի ո՛չ մէկ անդամ նիստերու եկած է երբէք իրեն չափ լաւ պատրաստուած եւ ուսումնասիրած օրակարգի խնդիրները: Այս մասին մէկ հոգի միայն կրնայ բաղդատութեան դրուիլ իրեն հետ, բարեյիշատակ Արիստակէս Գասպարեանը, որ ժողովին վիճաբանութեան առարկայ եղած խնդիրներուն վրայ օրը օրին հրատարակութիւններ ըրած է «Իւզանդիոն»ի մէջ: Ան ալ անաչառ խօսող մըն էր: Իսկ Տ. Հմայեակ ամէն ուրքու կոտրած է աննկատ, անվեհեր կերպով իր կարծիքը յայտնելու եւ պաշտպանելու մէջ, հոգ չէ թէ ժողովականներուն ստուար մասին զգացումներուն եւ համոզումներուն հակառակ ըլլայ անիկա: Իր կեցուածքը, խնդիրը խորապէս ուսումնասիրած ըլլալը պատկառանք ներշնչած են միշտ, թէեւ ինք ուրիշներէ բոլորովին տարբեր եզրակացութիւններու յանգած ըլլայ, ինչպէս, երկար բարակ թուումն մասանցներէ ետքը, նախորդ Տեղապահը աւելի քան հարիւր հազար ոսկիի հատուցման դատապարտել տալ ուզելը...: Ընդհանուր ժողովի նախկին ատենագրութիւններուն մէջ ոչ ոք թարթափած է իրմէ աւելի: Փաստեր որոնած է այնտեղ իր խօսելիք նառին համար եւ գիշերներ լուսցուցած է յանախ այս ապերախտ աշխատութեան անձնատուր, մէկ կողմէ սիկաոր վառելով, միւս կողմէ սրճամանը քշելով տաք մոխիրին խորը եւ միանգամայն ատենագրութեանց հաւաքածոն պրպտելով ուշադիր, դէմքը քսուելով թուղթերուն, չարաչար աշխատանք, որ աչք մը տուժել տուած է իրեն:

«Համոզումներուն մէջ անվկանդ մնացած է, հակառակ իրեն դէմ եղած հալածանքներուն եւ սօփային, զոր այս անաչառ եւ ազգասէր հոգեւորականն ալ համոտեսց Բիւզանդ Բէչեանի, Տօքթ. Սեղբոսեանի եւ Ժիրայր Շիրակացիի հետ, զոն դաշնակցական սեփականութեան, որ դարանակալ կը սպասէր եկեղեցիներու բակը եւ փողոցներու մութ ան-

իրենները: «Շէյխ Վահտեթի» չանուանեցին՝ զինքը, ուրիշ փաղաքուշ ածականներ ալ չտուին այս պատուական եկեղեցականին, պարզապէս այն պատճառաւ որ կը հակառակէր անոնց առջեւ բանալ Ս. Խաչի դռները: Բայց ահաւասիկ տարիներ ետքը իրեն վիճակեցաւ խարանել նոյն տաճարին բեմէն, խուժուժ սպանումը եղերաբախտ Դեռնդ Դուրեան Ս.ին, որ քարոզիչ եղեր էր այդ եկեղեցիին եւ հարազատ գաւակն էր Սկիւտարի:

«Զօրեղ նարագրի տէր մարդ, իր սկզբունքներուն վրայ անշեղ, հետաքրքիր միտք, ծայրայեղ աշխատասէր, աղքատներու բարեկամ. անշահախնդիր եկեղեցական, անբասիր կեանք, կեղծիքէ չախորժող, ուրիշ ինչ գիծ պիտի փնտոննք, որ աւելի լուսաւոր ընծայէ եկեղեցիին եւ ազգին ծառայութեան նուիրուած կեանք մը, տօնելու համար քառասուն տարիներու հոլովում մը, յոբելեան մը վերջապէս. որ թերեւս պիտի ըլլայ սփոփանքի ըոպէ մը տառապահիւժ կեանքի մը փշալից անցքերուն մէջ:

Ահա այդ Յօբելեանն է, զոր կ'իրականացնեն Ս. Խաչ եկեղեցւոյ Պատ. Թաղ. Խորհուրդը ու անկէ բղխած Յօբելեանական Յանձնաժողովը:

Անկաշառ այս ՆԿԱՐԱԳԻՐԸ, ծախու չառնուող այս ԽԻՂՃԸ, պատիւէ խոյս տուող եւ սակայն պատիւը իրեն ձգող այս զարմանալի «Ես»ը, ժողովականի հակակարծիքութեան զայրոյթը հոգեւոր հօր մը սիրոյն հետ չփոթող այս ՄԵԾ ՀՈԳԻՆ, վայելքն ու վիշտը ի հարկին հաւասարապէս արհամարհել կրցող այս աննկուն ԿՍՄՔԸ, օրէնքի տասնուցին նախանձախնդրութեամբ ոսկիներու փայլին վրայ թըքնող այս ՈՒՆՏԻ ԶԻՆՈՒՈՐԸ, Հոգեւոր Պետն իսկ ամբաստանելու մէջ անվերապահ եւ սակայն տարիքով իրմէ շատ պզտիկ այլ եկեղեցական պատիճանով մը միայն իրմէ բարձր եղբայրակցի մը աչին վրայ ի համբոյժ խոնարհող Քրիստոսի այս ԾԱՌԱՆ, չյիշեցնե՞ր մեր Փրկիչը, որ իշխանաւորները

խարանեց «Առաջնորդք կոյրք, որք զմժղուկս քամէք եւ զուղտս կլանէք» որոտալով եւ քանի մ'օր վերջն ալ իր աշակերաններուն ոտքը լուսաց:

Հաճոյք մըն է մեզի՝ իր համեստ կենսագիր եղբօրը՝ համար, խոնարհիլ այս անստգիւտ եկեղեցականին զողջօջ աշոյն եւ հրաւիրել նաեւ այն ամէն հայրդղիները, որոնք մեր այս տողերը կը կարգան, որպէսզի ընկերանան մեզի յարգանքի, հիացումի եւ սփոփանաց մատուցումի մեր արտասայտութիւններուն մէջ:

Վ Ե Ր Զ

* * * Յօբ. Յանձնաժողովոյ այս հրատարակութիւնը ձրի է .

* * * Յանձնաժողովը խորին շնորհակալութիւններ կը յայտնէ .—

Պ. ԶԳՕՆ ԽՕՐԱՍԱՆՃԵԱՆԻ

որ հրատարակութեան ամբողջ թուղթն ու կողքը նուիրեց:

Պ. ՄԿՐՏԻԶ ԻԻԹԻԻՃԵԱՆԻ

որ հրատարակութեան քիչէները պատրաստեց ձրիաբար:

Պ. ՅԱԿՈՒ ԱԲՐԱՀԱՄԵԱՆԻ

որ մէկ ֆօրման ու կողքը ձրի տպելէ զատ շատ մըն ալ զիւրութիւններ տուաւ իրեն:



« Ազգային գրադարան



NL0173795

12

12/1

9/11

9/11 0